

Sudeutsa asaktsa Sesus harere bo hyỹ mykaranaha sibo ziwatahaka

Tubabatu Deus Sudeutsa isopykwytša nisispirikpo asahi iharere bo tsikaeni zuba ma zikaha iwaze aty ja Sudeutsa bo ziwatahaka, Sesus soho ty nisispirikpoko. Sesus zuba Deus bo mymyoktyhyrykta atahi myhyrizikwanikita ana hi ziwataha. Deus hyrikoso ituk niapykyryk tahi iwatahi Deus harere ziwataha. Abaka katsa kino niwatihi Sesus soho humo tanymyryky.

Deus tse babata.

1 ¹Tapara Deus taparaktsa bo ziknapamykysoko iharere ziwabykynaha. Hawa hatsa myzotsa Sudeutsa bo ziknapamykysokonaha. Deus sohokotsa taparaktsa bo iharere ziknatsasokonaha. ²Abaka Deus tatse mybo zipaha, atahi Deus harere mybo motsasoko. Atahi mybarawy nizukni Deus harere eze. Deus isuknihyize ipe:

— Mybarawy tsizubarēna abo nyny my — niy. ³Atahi imysapyrēnikita my. Atahi imykyzonikita my. Deus wata my, hawa Deus mykara mymywatawyky. Iharere humo mybarawy ezektsa bo pisapywyky. Mybarawy iharere humo wasani mykara. Atahi mysapyzekenihyrikosokda iwaze mymysapybyitsa tsikykaranaha tsmoewynahaze atahi mymyokzohik. Iwaze bijoikpe bo nido. Deus humo ba hawa tohi zikaha ibaze tadyhy. Deus tihi:

— Kapanuryk taba dyhyty — niy.

Deus tse bijoikpe iknyktsitsa ahatsa soho.

⁴Atahi taparakta my. Bijoičke iknyktsitsa Deus tsumuēhītsitsa simysapyrētsa maha atakta tsimysapyrēta babata my. Deus bijoikpe iknyktsitsa soho — Ikiahatsa katsumuēhītsitsa tsimaha — my.

Deus ipe niy: — O katse babata tsimy — my ⁵Ba bijoikpe iknykta soho Deus ipe: — Ikia katse tsimy. Aba azo mozik — niy.

- Ana harere ty hi batu tyso. Iwaze tihi: — Ikia kape kazo asopyk.
Utakta ipe katse my — niy.
- Anaharere batu bijoikpe iknyktsa bo ziky.
- ⁶Iwaze Deus tse babata estuba zubata mybarawy bo zipehaze Deus tihi:
— Bijoikpe iknyktsitsa sizubarẽtsa katsumuẽhĩtsitsa ibo
mynasakibazikiknahaktsa!
“Ikiakta tsamysapyrẽta. Ahumo mykurẽtsa hỹ” tsimaha — niy.
- ⁷Deus harere papeu humo bijoikpe iknyktsa soho botu
ziwatahakanaha.
— Bijoikpe iknyktsitsa katsumuẽhĩtsitsa maha.
Mysipehaze aidytsa mykaranaha zopok waha.
Deus harere bo ma mykaranaha.
Asaktsa imysapybara izo hyrity watsa — niy.
- ⁸Itse soho zuba Deus harere papeu humo tihi:
— Ikia zuba mybarawy ezektsa tysipehakakta.
Awahi abazubata tsimy.
Hawa tsimy kara ba zimyi wasani tsimy kara.
- ⁹Hawa ha ty tisapyrẽna hyỹ tynakara, hawa ha ty batu isapy batu hỹ
tynakara.
Iwatahi Deus zawatawyhik ba iakyri tabo zikozonaha.
Atuktsa sakurẽtsa moziknaha, ikia zuba akubabata — niy.
- ¹⁰Deus harere niwatihi papeu humo:
— Ikia abazubata koikny bakta tu mybarawy tsikzukni.
Ikia hi bijoikpe tsikzukni wytyk tsikzukni.
- ¹¹Mybarawy mopykba. Ikiakta awahi tsimynapykyk ba zikokza.
Mybarawy mysuk isapy barawa mozik.
Hawa mysuk mysykbaikze mopapykiknaha.
Anawahi mybarawy mysapybyrize mohokda.
Iwaze Deus usa mybarawy isapyzeyk mozokni.
- ¹²Hawa mysuk ty zozozo tsimaha iwaze usta mysuk tsikorobyknaha.
Ikia mybarawy mopykze iwaze usa mybarawy isapyzeyk
mozokni.
Ikia zuba koikny baktatu astatu tsimy, ba zik tsaikba.
Awahi amysapyrẽta — niy.
- ¹³Deus bijoikpe iknykta humo batu ziky iwatahi batu ipe my:
— Kabaze dyhy ty! Kapanuryk taba dyhy ty!
Bykyze kazikwy humo asukyrytsitsa aharere bo hyỹ mykaranaha
— niy.
- ¹⁴Bijoikpe iknyktsitsa hawa mykaranaha. Asaktsa sihyrikosotsa
maha. Deus tsumuẽhĩtsitsa maha. Deus tyryktsa bo mysiakzoko,
mysitsumuẽhĩnaha. Deus tyryktsa Sesus Kiristu humo simysapyrẽtsa
moziknaha, iwaze sibo Deus bijoikpe iknyktsitsa mysiakzoko.

Deus harere tsiwabytoktokonahaktsa.

2 ¹Deus tse babata mybo ziakzo iwatahi iharere bo tsiwabytoktokonahaktsa! Iharere wasani zuba. Pykyhytu iharere bo hyĩ tynakaranaha iwaze myspirikporẽtsa tsimoziknaha. ²Deus harere taparaktsa bo nitsasokonahaze bijoikpe iknyktsa ana ty hi hyĩ nikaranaha. Anaharere bo myzotsa batu hỹ nikaranaha iwatsahi sinini nikaranaha.

³Katsaktsa ja. Abaka Deus wasania ty tsiwabytoktokonaha zeka Deus pe myzo mysopyk. Deus wasania ty tywabyziu ahabyizeka batu Deus pe myzo mysopyk. Sinini tsimykaranaha hỹ. Myzotsa watsa sinini tsimykaranaha. Bijoikpe iknyktsitsa batu mybo tyso hawa Deus pe myzo mysopyk. Sesus abazuba tahi ituktsa bo Deus wasania ty nitsaso. Hawa Deus pe myzo mysopyk sibo nitsasoko. Iwaze asahi:

— Nawa ha ty botu tsiwabyntaha iharere baba, ana humo kino wasani hỹ — niaha. Iwaze ituktsa mybo nitsasokonaha.

⁴Iwaze Deus siharere bo yhỹ mykara. Tahyrikoso humo hi amy ty kytsa batu zikaha asatu mykaranaha. Deus hyrikoso situk mynapykyryk iwaze aparakbaha mozororobanaha, Deus zikwy humo. Deus isapyha ty aparakbaha bo nyny niy. Deus hyrikoso situk mynapykyryk iwatsahi kytsa sipybyrẽtsa. Iwaha humo Deus siharere bo yhỹ mykara. Iwatsahi wasania ty ahabyi zeka sinini tsimykaranaha.

— Sesus Kiristu Deus ziphata Deus bo mymyoktyhyryk —.

⁵Iwaze mybarawy mopykze Deus usa mybarawy mozokni. Deus hi:

— Mybarawy ezytyk ezektsa ahaharere bo yhỹ mykaranaha — niy. Ana kino bijoikpe iknyktsitsa batu tyso. Katsaktsa mybarawy ezektsa bo nitsaso. ⁶Aty Deus harere botu ziwatahaka:

— Kazo kytsa asaktsa nisisukni sipunihikbyitsa maha.

Iwatsatuze asaktsa ba zikspiriktsokda.

Sihumo tsimypokzitsiukrẽta.

⁷Abaka bijoikpe ezektsa sihyrizikwanitsa. Mybarawy ezektsa batu.

Aiba tohi mybarawy ezytyk myze

mybarawy ezektsa myhyrizikwanitsa tsimoziknaha,

Deus humo aparakbaha sizubarẽtsa myharere bo yhỹ mykaranaha.

Simysapyrẽtsa moziknaha — niy.

⁸Abaka mybarawy ezektsa isephatsabyitsa.

Aiba tohi zuba mybarawy ezytyk ezektsa mysipeha.

⁹Abaka Sesus bo iktsa tsimaha. Deus wytyk bo ziphaze jokboa tu mywata niyzik. Bijoikpe iknyktsitsa sihyrizikwanitsa niyziknaha. Abaka mekybotu my. Sesus nihyrikosokda humo atahi abazubata mozik.

Aparakbaha iharere bo zuba hyĩ mykaranaha. Deus mywatu imypokzitsi iwatahi Sesus mysapyzeka nihyrikosokda. ¹⁰Deusta koikny bakta tu mybarawy nizukni. Tszubarēna nizukni. Iwatahi mybarawy ezektasa tatuktu mysisapy tshikik, ihyrytsa moziknaha anawahi mozihihik. Iwatahi Sesus mymyoktyhyrykta mysapyzeka sinini nikara, wasani my. Deus aparakbaha humo tsimypokzitsiukrēta iwatahi itse babata mysapyzeka sinini nikaraze — wasani my — Deus niy.

¹¹Sesus humo mywatu simysapyrētsa moziknaha. Deus tse babata humo simysapyrētsa moziknaha. Sisapyrēnikitsakta Deus hyrytsa maha. Iwaze Sesus myzubaha okze:

— O asakta simysapyrētsa maha utakta ispe: “katukytsa” kasopyk — niy. ¹²Hawa nitsaso botu Deus harere papeu humo ziwatahaka. Ata tihi:

— Kazo asoho katukytsa bo motsasoko,
izumubanhaze abo mosakibaziki

“O kazo ikia tsamysapyrēta” — niy.

¹³Deus harere papeu humo ziwatahazo. Ta tihi:

— Utakta Deus humo kaspirikporēta iwatahi iharere bo hyĩ iky — niy.

Ata tihizo: — Utakta kahyrytsa tuk mynapykyryk. Deus hi isty kabo nyny niy — niy.

Iwa botu ziwatahaka Deus harere papeu humo Sesus soho ziwatahaka.

¹⁴Sesus mybarawy ezekta mywata niyzik. Mybarawy ezektasa ihyrytsa tsimoziknaha. Mytsani myspu tsimaha iwatahi mywata niyzik. Mybarawy ezekta tuze mohyrikosokda ziky. Nihyrikosokdaze hyrikoso sapybara nisipehakata, Satanas inarokota, Sesus humo zikwybyita niyzik. Sesus ba hawa tohi zikzukni iwatahi Satanas zikwybyita niyzik. Tapara Satanas myzubaha ziknamykbabaka abaka batu, Sesus tahyrikosokdawy humo iwaze Satanas myzuba myhyrikosokdawy batu ziky.

¹⁵Mybarawy ezektasa batu mohyrikosokda tshihiknaha. Pibiyituhukutu tahapyby myziykyknaha. Tahapetu sisopyk tihi:

— Utakta ba zikara — mynakananaha. Sesus hi mysapyzeka nihyrikosokda. Abaka mywatu ispe:

— Tsimyhyrikosokdanaha zeka ahapyby byihu ja — my. ¹⁶Sesus bjoikpe iknyktsitsa ba ziksitsumuēhī. Mybarawy ezektasa Abarão tsekokatsa asa hi mysitsumuēhīki asakta ihumo simysapyrētsa moziknaha. Atahi Deus bo mysioktyhyryk. ¹⁷Iwatahi mybarawy ezektasa Deus bo mysioktyhyrykta itukytsa wata niyzik. Mybarawy ezekta niyzik. Sesus taparakta Deus wahoro zubata eze ziknapamykysokota wata niyzik. Atakta Deus tsumuēhītsa my, Sesus niwatihi. Deus tsumuēhītsa my. Ziknapamykysokota mybarawy ezektasa nisitsumuēhīki Sesus niwatihi mybarawy ezektasa nisitsumuēhīki. Mybarawy ezektasa humo tsimypokzitsiukrēta hỹ. Sesus Deus harere bo hyĩ ziknakara, iwatahi imysapyrēnikita my mybarawy

ezeiksa sapyzeka nihyrikosokda iwa Deus bo nisioktyhyryk iwatahi mywatu ihumo simysapyrêtsa moziknaha, iwatsahi Deus pe:

— Myzo — mysopyk. Deus mype:

— Kahyrytsa ahasapybyikitsa tsikykaranaha Sesus humo pahaokzo — iwa Deus mykara. ¹⁸Sesus sinini nikara. Satanas hyrikoso sapybara ty zimiywy tsihikik naha zetu batu hÿ niy. Iwatahi Sesus mybarawy ezeiksa mysitsumuêhĩ. Asaktsa ustsá mysimiywy tsihikiknaha ata hi mysitsumuêhĩkĩ iwatsahi wasani zuba yhÿ mykaranaha. Iwatsahi batu simiy ana humo hi Sesus mybarawy ezeiksa niyzik iwatahi mywatu namytsumuêhĩkĩ.

Moises Deus tsumuêhĩtsa. Sesus Deus tse babata.

3 ¹Iwatsahi Sesus soho humo mytsatzyiutaha katukytsa! Deus nimywatawy ityryktsa tsimoziknaha. Sesus hi mybo nitsasoko Deus zipehata my mywata niyzik. Atakta ziknapamykysokota taparakta myhyrizikwani. Ustsá bo tihi zeka:

— O katsaktsa Sesus mymyoktyhyrykta humo myspirikporêtsa tsimoziknaha iwatahi mymytsumuêhĩkĩ hÿ — tsimaha. Iwatsahi Sesus soho humo mytsatzyiutaha! my. ²Ata kino Deus harere humo hyÿ ziknakara, iharere humo pykyhytu hyÿ ziknakara. Moises Deus harere bo yhÿ ziknakara. Atahi Deus tyryktsa nisihyrinymyryky. Sesus kino niwatihi Deus harere humo pykyhytu hyÿ ziknakara. ³Atakta abazubata. Sesus abazubatahi Moiesta jokboata tu iwatahi Sesus harere bo hyÿ tsimykaranahaze wasani tsimykaranaha. Kytsa wahoro mozoknikinahaze katsaktsa:

— O awahoro tisapyrêta ikia asopykziurêta — tsikaha. Maku tsihyrinymyrêta iwahoro nizukniki naha humo. Moiesta jokboata tu zuba myhyrizikwani my. Deus Sesus soho:

— Ikia abazubata — my. Iharere abazubata my. ⁴Kytsa wahoro zuba nizuknikinaha. Deusta mybarawy tsizubarêna nizukni.

⁵Moises Deus hyriziktsokzawy wasani ziknakara. Deus tyryktsa nisihyrinymyryky iwa tarabaja ziknakara. Hawa Deus mykara nisihyrinymyryky. Deus tyryktsa humo tsimypokzitsiukrêta atakta Deus tsumuêhĩtsa zuba.

⁶Sesus Kiristu hi Deus isopyk katse babata my. Atahi Deus hyrytsa humo tsimypokzitsiukrêta hÿ. Katsaktsa Deus hyrytsa tsimaha, atakta myperytsa zubata. Mypunihikrêtsa zeka katsa tihi:

— O Sesus humo mysapyrêtsa tsimoziknaha, mywahi Deus tuk tsimynapykyryknaha ana humo ka mykurêtsa hÿ — tsimaha.

Deus tyryktsa iziuha bo tsimypupunaha.

⁷Iwatsahi Sudeutsa siakbatsa ba siwa zikaha! Tubabatu Deus hyrikoso sisoho ziwatahaka:

— Abaka kaharere tsiwabynahaktsa!

⁸ Kaharere tsiwabybynahaze batu h̃y tsimaha iwaze batu tyso.
Taparaktsa ahadiritsa kaharere bo batu h̃y ziknakaranaha
sioktiokanikitsa.

Jerukbara eze tuze kaharere bo batu ma zikaha.

Tahapetu sisopyk:

⁹ “O katsaktsa mysapybyitsa tsimykaranaha zeka Deus myhumo batu
iakryi” nikaranaha.

Sitsyhyryze kazikwy iwatawy iwatsa tu kaharere bo batu h̃y
ziknakaranaha.

¹⁰ Kuarēta nityktseheze ziknasitsumuēhīkī iwatsa tu kaharere bo batu
h̃y ziknakaranaha.

Iwaze sihumo takyriki.

Kapetu kasopyk: “O simysapybyitsa soho humo mytsaty
ziknakaranaha.

Kasopyk humo batu sihyrinymyry iwatsahi zikmyikinaha” iky.

¹¹ Iwatahi ikykubyrisorokbyize

batu aty tohi katuk zikapykyryk iky — Deus hyrikoso niy.

Deus harere hi papeu humo botu ziwataha.

¹² O katukytsa pykyhytutaha! Hawa mytsaty tsimykaranaha
pykyhytutaha! Deus koikny bakta tu tawahi my atahi zinymyrybata.
Hawa ja isapybara bo mytsaty tsimykaranaha zeka tamyikik tsimaha.
Iwaze Deus harere humo batu h̃y tsimykaranaha iwatsahi pykyhytutaha!
Ahamyspihikbata byihuja! ¹³ Pibytuhukutu tyharape kusuknikinahaktsa!
Iwaze tsimahaze ba ahamyiwy. Deus mydiritsa siakbatsa pe:

— Aba kaharere humo hỹy tahaktsa — niy. Deus kino myhumo
niwatihi — Abaka kaharere humo hỹy tahaktsa! — my, iwaze tyharape
punihikwynahaktsa kytsa! Sesus Kiristu humo tsikaha spirikpotohinaha.

¹⁴ Tapara Sesus humo ahaspirikporētsa ihumo ahakurētsa tsikyziknaha.
Iharere wasani tsimaha. Ihumo tyspirikponaha! Kyze mywahi ituk
tsinapykyryknaha. Tsimyhyrikosokdanahaze Kiristu watsa tsimoziknaha.

¹⁵ Deus harere papeu humo:

— Abaka kaharere bo wabytaha!

Kaharere tsiwabybynahaze batu h̃y iwa batu tyso.

Taparaktsa ahadiritsa kaharere bo batu ma ziknakaranaha
Ba siwa zikaha! — niy.

¹⁶ Mydiritsa Deus harere ziwabynaha. Mydiritsa Deus harere humo
batu h̃y ziknakaranaha. Asaktsa Moises Esito ekze nisioktyhyryk nahatsa.

¹⁷ Asaktsa jerukbara buruk niukurunaha. Isapybara ty nikaranaha ana
humo hi Deus takyriki, iwatsahi jerukbara buruk niukurunaha. Kuarēta
nityktseheze ziharamuze. Anaeze sizubarētsa niakbanaha. ¹⁸ Asa kino
Deus harere bo batu h̃y ziknakaranaha. Iwatahi Deus hi:

— Iziuha botu nikymy ba zikapykyryknaha — niy.

Iwa hỹ niy.

¹⁹Iwatahi ziuha Deus botu nikymyze ba zikpupunaha. Iharere humo batu hỹ ziknakaranaha, iwatsahi iziuha bo ba zikpupunaha.

4 ¹Deus hi mybo nitsasoko tahi:

— Iziuha aha bo ikymyba anaeze tsimypykyryknaha — niy. Katsakta pykyhytu tsimahaktsa! Imysapybara ty tsimykaranaha zeka tsimiwykynaha! Deus harere humo zuba hyỹ tahaktsa. Iwaze iziuha bo tsinapupunahaktsa! ²Mydiritsa siakbatsa Deus harere ziwabynaha. Ana ty hi batu hỹ ziknakaranaha. Deus nisisapywy tsihikik batu zik asahi iharere humo batu hỹ ziknakaranaha. Katsa kino niwatihi Deus wasania ty tsiwabykynaha. Pykyhytutaha anaharere humo hyỹ tsimahaktsa!

³Katsakta ihumo myspirikporëtsa iwatsahi iziuha bo abaka tsimynapupunaha. Anaeze tsimymybyrynaha. Hawa Deus byrykywy katsa kino niwatihi tsimymybyrynaha. Deus mybarawy nizuknibaze tabyryky, tahyriziktsozkawy zipyke tabyryky. Katsa kino niwatihi iziuha eze tsimybyry tsihikiknaha. Taparaktsa mydiritsa siakbatsa Deus sisoho tihi:

— Iziuha eze botu ahabo ikymyba
ba zikabyry — niy.

Sihumo takyriki iwa niy.

⁴Deus tabyrywy soho iharere papeu humo ziwatahaka:

— Nawa zuruze usta tsyhyry humo estuba zuba ziakbataze Deus mybarawy nizukni.

Kyze nawa zuruze usta tsyhyry humo petok ziakbataze tabyryky tahyriziktsozkawy zipyke — niy.

Deus harere papeu humo ibyrykywy soho.

⁵Deus harere papeu humo ziwatahazo mydiritsa siakbatsa soho:

— Iziuha eze botu ikymyba ba zikabyry — niy.

⁶Deus iziuha bo kytsa mynapupunaha mozihikik. Asaktsa mydiritsa siakbatsa hi iziuha eze Deus botu sitsyhyryze zikymyba, ba zikpupunaha, anaeze ba zikabyry. Iharere humo ma zikahabyitsa tuze iziuha bo batu paku paku. Iwaze Deus ustsá kytsa iziuha bo mynapupunaha iwa mozihikik. ⁷Bykyze iwatahi usta zuruze soho:

— Abaka kaharere humo hyỹ tsimaha — niy. Deus harere Dawi ziwatahaka hi:

— Abaka kaharere bo wabytaha!

Kaharere tsiپیwabynaha zeka ahasopyksapyhu ja — niy.

Iwa Dawi tsekokatsa ziwatahaka.

⁸Sosue nihyrikosokdata Deus tyryktsa, Kanaã bo nisioktyhyryk. Deus iziuha nisioktykyryk zeka Deus usta zuruze soho:

— Abaka kaharere bo hyỹ tsimaha — batu tyso. Nawa Dawi ziwatahaka ustsá tyryktsa soho niy. Asahi Deus iziuha bo mynapupunaha. ⁹Iwatahi Deus hyrytsa pe niy:

— Kahudikhudikwy tisapyrēna bo tynapupunahaktsa! — my. Deus mybarawy nizuknize iwaze tabyryky. Tabyryky nahawatihi katsa kino tsimymybyrynaha anawahi Deus mozihikik.

¹⁰Deus sapy iziuha bo tsinapupunaha zeka tsimymybyrynaha. Myhyriziktsokzawy mopyk. Hawa Deus tabyrykyze katsa kino tsimymybyrynaha hỹ. ¹¹Iwatsahi Deus hudikhudikwy tisapyrēna boktsa! Ana soho bo hi mytsatyziutahaktsa! Mykubyrisorokrētsa tsimoziknaha iwaze iziuha bo tsimaha. Ba siakbatsa wa zikaha. Asaktsa Deus harere humo batu hỹ ziknakaranaha iwatsahi Deus hudikhudikwy bo ba zikupunaha.

¹²Deus harere ka simyharerewabytsa wata my. Iharere mynamyhyrinymyryky. Deus harere tsiپیwaby nahaze hawa ha ty mytsaty tsimykaranaha mymywatawyky. Hawa tsimyzihikiknaha mymywatawyky. Mytsaty tsimykaranahaze hawa ha ty wasani my Deus harere mymywatawy. Mytsaty tsimykaranahaze hawa ha ty batu isapy iharere mymywatawy. Deus harere sokorotsapu wata. Sokorotsapu titsarirēta, petok taba itsariwyhyta tawata. Siraratsa nizyzykyrywy wata. (Ipoiktsa sotsokowy buruk maha sokorotsapu tuk tsizykwynaha. Iwatsahi myraratsani sipoiktsa iknyktsa tsiboknaha.) Hawa sokorotsapu myraratsani metutu mykara nawaze Deus harere hawa mytsaty tsimykaranaha hawa tsimyzihikiknaha metutu mykara.

¹³Deus zinyba hỹ, katsa ba ijokbyi bo zikaha. Hawa tsimykaranaha zinyba. Tsimyhyrikosokdanahaze atahi mymywaby. Tsimytsasonahaze:

— O nawa ikykara — botu ziny iwaze hawa tsimytsasononaha wasani tsimaha zeka tsihyrinymyrēta. Iwatsahi mydiritsa watsa byitahaktsa! Deus harere bo hyỹ tsimahaktsa iwaze Deus hudikhudikwy tisapyrēna bo tsimypupunaha

Sesus ziknapamykysokota babata myhumo tsimypokzitsiarēta.

¹⁴Tubabatu taparakta ziknapamykysokota Deus wahoro zubata bo ziknatsukuk. Iwatahi Deus tse babata bijoikpe bo nitsuk Deus tuk. Atahi abazubata. Iwatsahi ihumo tsimyspirikpotohinaha.

¹⁵Taparakta Deus wahoro zubata eze sizubarētsa nisitsumuēhikī. Asaktsa batu sipunihik nisitsumuēhikī. Sesus hi mymytsumuēhikī atahi mybarawy eze ziknapykyrykze sinini ziknakara. Iwatahi mymytsumuēhikī. Satanas zimyiwy tsihikik Sesus iharere bo batu hỹ ziknakara. Iwaze Satanas nimymyiwy tsihikikze Sesus mymytsumuēhikī myhumo tsimypokzitsiukrēta. Atahi mymypokzitsiki ta mywata niyzik. Hawa haty tsimykaranaha zinyba iwatahi mymytsumuēhikī.

¹⁶Iwatsahi Sesus bo tsipomokonaha. Mysikpybybyitsa Deus myzo bo tsimypamykysobanaha. Mypunihikrētsaktsa! Deus myzo hi mymysapywykik. Myhumo tsimypokzitsiukrēta. Mypunihikbyitsa zeka atahi mymytsumuēhikī. Iwatsahi mypunihikrētsa tsimoziknaha.

5 ¹Hawa taparaktsa Deus wahoro zubata eze ziknapamykysokonahatsa siwatawyhytsa niyzik naha motsasoko. Deus nisiwatawy kytsa tu nisiwatawy. Iwaze kytsa nisitsumuēhīnaha ana humo hi Deus nisiwatawy. Nawa ha ty kytsa Deus bo zibiakaknaha ana kino Deus bo nyny niaha. Aparakbaha humo nyny ziknakaranaha. Deus okzeka myraratsa nisiwezokonaha iwatahi Deus sitsihitsa humo batu iakyri simysapybyitsa nikaranaha nisiokzohik.

²Sipunihikbyitsa tu iwatsahi harape humo simypokzitsiukrētsa niaha. Asaktsa zimyikinahatsa humo simypokzitsiukrētsa. Asaktsa batu sihyrinymyry niwatihi sihumo simypokzitsiukrētsa. Taparaktsa Deus wahoro zubata eze ziknapamykysokonahatsa sipunihikbyitsa kino nikaranaha. Iwatsahi ustsā humo simypokzitsiukrētsa niaha. ³Asaktsa kytsa watsa. Iwaze myraratsa Deus okzeka nisiwezokonahaze asahi:

— O Deus kamysapybyita tu ikykara iwatahi karara ty ikia bo nyny my iwaze tsikokzohik. Iwaze ikia kape:

“Amysapybyita tu tsikykara paokzohik myraratsa tsihitsa niwatihi simysapybyitsa tu nikaranaha iwaze myraratsa ty kabo nyny tsimykara iwaze mysiozkohik my” — nikaranaha. ⁴Batu aty tohi ziktawatawy ziknapamykysokota zikyzyk. Batu. Deus humo maku ziknapamykysokota mozik ata hi maku ziwatawy. Arō tapara ziknapamykysokota niy. Deus humo iwatawyhyta niyzik.

⁵Taparaktsa Deus wahoro zubata eze ziknapamykysokonahatsa siwatsa Kiristu mynakara. Siwatsa ba ziktawatawy, Deus hi ziwatawy. Iwatawyhyta tu Deus ipe niy:

— Ikiakta katse, abaka azo mozik — Deus niy.

⁶Usta harere Deus papeu humo ziwatahaka:

— Merikisedek wata tsmozik.

Merikisedek Deus ziknapamykysokota Deus wahoro zubata eze ziknakara.

Aparakbaha nisibetesaka Sesus iwata katyryktsa tsysitsumuēhī mynakara.

Mysibetesaka, tawahi mysitsumuēhīkī

Deus harere papeu humo niy.

⁷Sesus mybarawy ezekta tu Deus bo ziknapamykysoko. Deus bo hua hua niy, ihyritsik zipoko. Deus zikwybata tu nizihikik zeka ziaксе iwa zeka batu zikyrikosokda. Iwaze Deus zitsumuēhīkī Sesus taso ho bo zuba batu mytsaty ziknakara, tazo bo zuba mytsaty ziknakara. Iharere bo zuba hỹ ziknakara. Iwatahi Deus iharere ziwabyky.

⁸Atakta Deus tse babata niy. Iwatatu sinini ziknakara ana humo hi Deus harere bo hỹ ziknakara. Sinini nikara atahi Deus harere bo hỹ ziknakara ana humo hi zinymyryky. Anahumo ihyriziktsokzawy nikymyba. ⁹Atakta tsimysapyrēta. Imysapyrēnikita tu mybarawy ezektsa

Deus bo mysioқтыhyryk. Asaktsa iharere bo zuba hȳ mykaranaha, ihumo simysapyrētsa moziknaha. Deus tuk tahawahi mynapykyryknaha. ¹⁰Deus Sesus pe niy:

— Ikia zuba tapara ziknapamykysokota tsimozik. Merikisedek wata tsimozik. Mybarawy ezektsa tysitsumuēhī mynakara, koikny bakta tu tawahi mysitsumuēhīkī — Deus niy.

Deus harere tsipinymyrytohinaha.

¹¹Tapara ziknapamykysokota niy. Hawa Sesus Kiristu Merikisedek wata pahayrinymyrykzyky. Hawa ha ty tshokdaharēna batu ahawabyhy. Ana harere tshokdaharēna humo batu wabyziu zikaha.

¹²⁻¹³Tapara Deus harere bo hȳ tsimykarannahaze hawa batu ihokdaha ahayrinymyrētsa. Hawa wasani batu ahayrinymyry. Hawa batu imysapy batu ahayrinymyry. Ikiahatsa sibykhyttsa watsa tsimaha. Ibykyhy taje tsotsik pezuku tawata tsimaha. Ibykyhy myzoho bazikboro ikiahatsa iwatsa tsimaha. Aibani zuba ibykhy siraratsani piboro. Iwaze ikiahatsa Deus soho tsimysihyrinymyrynahatsa watsa ustsā kytsa zuba pahayrinymyryknaha. Ikiahatsa hawa ha ty wasani ahape tu ahasopyk iwatsahi ahamysapyrētsa tsimoziknaha. Batu ba hawa tshokdaharēna batu ahayrinymyry iwatsahi sibykhyttsa watsa.

¹⁴Aty skaraba Deus harere bo zuba hȳ mynakara hawaha tshokdaharēna pinymyryky, iwaze tsimysapyrēta mozik. Asaktsa siypyktsa watsa maha, asahi myzoho piboronaha. Hawa Deus okzeka wasani my sihyrinymyrētsa, hawaha ty batu sapy sihyrinymyrētsa niwatili. Sispirikporētsa moziknaha. Tahapetu sisopyk iwatsahi sispirikporētsa moziknaha. Iwatsahi siypyktsa watsaktsa kytsa Deus harere piwabyziukunaha.

6 ¹Kiristu harere, nawa ha ty botu tsiwabynaha ana soho bo hi mytsaty mytsaty byitaha! Ana myspirikpowy batu ihokdaha h̄y. Ana myspirikpowy:

— Ahamysapybyitsa tsikykaranaha ana humo hi Deus tuk batu tsinapykyryknaha iwatsahi tsmoewynaha! Deus harere bo hȳ tsimykaranaha iwatsahi tsimyspirikpokonaha. ²Pihik ty myharasusuwy! Ustsā kytsa tahatsyhyrypetsa ty ahaharek humo paik mahaze Deus hyrikoso ahatur mynapykyryk. Deus siakbatsa nasihyrizikpobazo. Asaktsa Deus harere bo batu h̄y mykaranaha Deus sinini ykarawy bo mysipeha — niy. Ana kino botu tsinymyrynaha abaka usta myspirikpowy tsiwabytoktonahaktsa! Iwaze tsipinymyrybanahaktsa kytsa. ³Iwatahi ana hi tshokdaharēna ahabo tsimytsasoziukunaha. Katsa hi:

— O Deus ikia tynamytsumuēhīkta tsimahaktsa! — tsimaha.

⁴Kiristu harere zimoewynahatsa hawa ja niaha. Tubabatu Kiristu harere ziwabynahaze iharere bo yh̄ niaha. Deus hyrikoso situk niapykyryk. ⁵Asahi:

— O Deus harere tisapyrēna hỹ — nikaranaha. Hawa ha ty kytsa batu zik Deus mykaraze, iwaze asa tihi:

— O Deus zikwyrēnikita my. Ata hi zuba mybo mynasikzo ana ty hi mykara — nikaranaha. Ihumo sipybyrētsa. ⁶Iwaze Kiristu zerekeknaha ihumo batu sispirikpo niaha. Simysapybyitsa nikaranaha batu isty erek batu zikaha. Sesus Kiristu humo mospirikpozonahaze batu zikaha. Nispirikpobyinahatsa tu kytsa watsa asaktsa Deus tse iharapatawyhyta humo pihyrizikyzykyzonaha. Deus tse pimyjakanaha. Asahi Deus tuk ba zikakpykyknaha.

⁷Hawa mytsuhuk humo mymywatawyky. Mytsuhuk piokyrywynaha. Hyritsik mynawōze siriktsa moziponaha. Iwaze mydisahawyrētsa tsmoziknaha. Iwa Deus nimysapywyky. ⁸Usa waratok batu isapy my. Tserekrēna. Towahaditsa zuba mopykyryknaha. Anahi waratok batu mydisahawyky iwa zeka taoketarahoko. Waratok batu sapy hỹ. Na wata asaktsa Kiristu zerekeknahatsa tu Deus sinini ykarawy bo mysipeha.

⁹— O katukytsa ikiahatsa mekywa tu tsmoziknaha. Asaktsa Kiristu zerekeknahatsa batu siwatsa tsimaha. Kiristu humo ahamysapyrētsa tsmoziknaha. Sesus humo tsimyspirikpotohinaha — tsimaha.

¹⁰Ikiahatsa Deus hyriziktsokzawy humo tsikykaranaha. Tapara ahatukytsa tsiksitsumuēhikīnaha. Kiristu tuktsa humo tspokzitsinaha. Abaka niwatihi Deus tyryktsa mysitsumuēhīnaha. Iwaze Deus humo ahamypokzitsarētsa tsipiwatawykynaha. Ana humo kino Deus ba zikspiriktsokda iwaze pahasapywykyry. Atakta imysapyrēnikita tu pahasapywyky. ¹¹Sesus myziksizo iwatsahi taperykynaha. Taperykynahaze tuharapepokzitsikinahaktsa! Tyharape tsumuēhītohinahaktsa! Anaeze tu tsimyzihihiknaha. ¹²Ahazikabyrihuja! Pykyhytuty ahahyriktsokzawy humo tahaktsa! Kytsa asaktsa tubabatu Deus humo sispirikporētsa babatsa siwatahaktsa! Deus ispe niy:

— Aibani pahasapywyky — niy. Siakubyrisorokrētsa tu ziperykynaha bykyze Deus isapyhanikia ty sibo nyny niy. Siwatsa tsimahaktsa kytsa! Ahakubyrisoroku ja tsimaha.

Hawa ha ty Deus nitsaso atsatu mykara.

¹³⁻¹⁵Taparakta Abarão iwa niy. Atakta tispihikrēta. Deus ipe niy:

— Ikia pasapywyky. Kazikwy humo atse mopuruk ihumo atsekokatsa sizubarētsa moziknaha. Kaharere wasani atsa tyty mykara — Deus niy. Atakta tsimiharerewabyrēta tu iharere wasani hỹ, atsatu nikara. Abarão iharere bo hyỹ nikara. Tapetu isopyk:

— Deus katse ty kabo nyny my — nikara. Tispihikrēta niapykyk. Iwatahi Deus harere humo itse nipuruk. Deus harere wasani nikara. Iwa hỹ.

¹⁶Katsaktsa tsimytsaso tsihikiknahaze — Myharere wasani hỹ — my iwaze Deus okzeka myharere wasaniha. Katsa hi:

— O Deus ziknyba hawa motsasoko wasani mykara — my. Iwaze kytsa mysoho iharere wasani my. Hawaha motsaso atsatu mykara maha. Iwaze ba zikahapébetsaknaha, wasape nikara.

¹⁷Deus kino niwatihi tatyryktsa pe:

— Utakta pahasapywyky ikiahatsa katuk ahawahi tsimynapykyryknaha — niy. Ityryktsa bo ziknapamykysoko atahi:

— Kaharere wasani my. Utakta koikny baktatu kaharere atsatu mykara. Kaharere zuba — niy. ¹⁸Deus mype niy:

— Utakta pahasapywyky — niy. Ata tihizo:

— Kaharere babaka wasani mykara — niy. Ana harere soho batu mytsaty my. Tozeka ja ba harere mykara. Batu ba. Deus ba zikmypsipihikbata iharere humo wasani my. Iwatsahi mypunihikrëtsa! Katsaktsa botu Deus pe:

— O myzo ikia humo mysapyrëtsa tsimoziknaha — tsikaha. Iwatsahi taperykynaha! Atakta mymysapywyky, ihumo mysapyrëtsa tsimoziknaha ana hi taperyky iharere humo taperyky. ¹⁹Deus humo mysapyrëtsa tsimoziknaha, mywahi ituk tsimynapykyryknaha iwatsahi taperykynaha. Iwatsahi mypunihikrëtsa. Iharere humo mykurëtsa. Deus harere humo batu mypyby atahi mymysapywyky iwatsahi mykurëtsa tsimoziknaha. Deus tuk mywahi tsimynapykyryknaha ana hi taperykynaha.

Tubabatu taparaktsa Deus wahoro zubata eze ziknapamykysokonahatsa Deus sapy eze ipokpedawy bo nikaranaha. Atahi tapara ziknapamykysokota anaeze nitsuk hokbowy ty panu hi iokpezawy ty ana bo hi nitsuk Deus bo ziknapamykysoko myraratsa spu Deus bo nyny niy. Kytsa tsyhyryze Deus bo ziknapamykysoko. Sesus niwatihi bijoikpe bo nitsuk. Anaeze Deus bo isapyha ty nyny niy. Anaeze Deus mopykyk naha bo hi nitsuk iwaze isapyha ty nyny niy ziknapamykysokota wata. Abaka Deus baze atahi mytsyhyryze mynapamykysoko.

²⁰Tapara Sesus bijoikpe bo nido. Myharaze Deus bo niy. Atahi tapara inapamykysokota niyzik. Iwatahi mytsyhyryze Deus bo napamykysoko, anaeze Merikisedek wata ityryktsa tawahi mysitsumuëhikĩ. Aibani Deus bo mymyoktyhyryk ana hi taperykynaha.

Merikisedek Serusarëhe zipehata Deus bo ziknapamykysota niwatihi.

7 ¹Abaka Merikisedek soho motsaso. Atakta Serusarëhe ezektsa bo zipehata niy. Kytsa tsyhyryze Deus bo ziknapamykysoikik. Taparakta Abarão tasukyrytsitsa bo niwatsoroko, nipykze tawahoro bo ziksikiri. Ske buruk Merikisedek zihobyk. Merikisedek ipe niy:

— Deus zuba pasapywyky, isapyrënikia ty abo nyny my — niy.

²Abarão niwatsorokoze tasukyrytsitsa namy ziaaksebaik. Sinamy ty tsapukte buruk tuze iwaze ibo zibiakak. Tsizubarëna ty ibo nyny niy. Inamy mytsyhyrytsa sepyk nawaha estuba ibo nyny niy usta namy ty are niy. Iwa Merikisedek bo zibiakak. Merikisedek zinaro piwatawy tihi:

— Atakta tatyryktsa humo wasani ziknasipehaka — my. Serusarêhe hudikhudikwy ezekta mypehakatsa niy. Serusarêhe hudikhudikwy naro piwatawy.

— Ata humo ihyrytsa sakurêtsa moziknaha — my. ³Deus harere Merikisedekzo soho ty batu tyso. Taje soho ty batu tyso. Tadiritsa soho ty batu tyso. Tapurukwy ty batu tyso. Tahyrikosokdawy ty batu tyso. Atakta Deus tse babata wata niy. Deus bo ziknapamykysoikik. Merikisedek ityryktsa bo tawahi nisitsumuêhîkî.

⁴Atahi tsimyyharerewabyrêta nawa ha ty ahabo motsasoko. Isoho bo mytsatzyiutahaktsa! Abarão mydiri taparakta tu tanamy ty tsapukte buruk zibiakak. Taparaktsa sisukyrytsitsa namy ziakse ana kino nyny niy. Abarão isoho bo mytsaty nikara:

— O atahi tsimysapyrêta my — niy. Iwa mytsaty nikara. ⁵Tubabatu Abarão tsekokatsa Rewi inarokota Moises ihyrytsa pe:

— Ahatukytsa tahanamy ty tsapukte buruk ahabo pibiakaknaha. Ikiahatsa Deus wahoro zubata eze ziknapamykysonahatsa humo tahanamy ty tsapukte buruk ahabo nyny maha. Sinamy mytsyhyrytsawa sepyk nawa mahaze estuba ahabo nyny maha — niy. Iwa Moises harere papeu humo ziwatahaka. Rewi hyrytsa tahatukytsa namy ty zikziaksekenaha, namy ty sibo zikzibiakaknaha. Sizubarêtsa Abarão tsekokatsa niaha iwatuze tahatukytsa namy ty sibo nyny nikaranaha.

⁶Merikisedek mekywa tu niy. Atakta batu Rewi tukytsabyita niy, usta mekta tukytsa tu niy. Iwatatu Abarão tanamy ty ibo zibiakak. Inamy mytsyhyrytsawa sepyk nawaha ty estuba myze ibo nyny niy. Tapara Deus Abarão pe:

— Naka ahudikhudikwy mozik. Atsekokatsa sizubarêtsa moziknaha — niy. Iwa Deus harere Abarão pe niy. Kyze Merikisedek Abarão pe niy:

— Deus pasapywyky ahumo tsimypokzitsiukrêta — niy. ⁷Abarão ihyrizikwani ibo nitsaso. Merikisedek tihi:

— Deus pasapywy ahumo tsimypokzitsiukrêta — niy. Aty anaharere motsasoko tsimyyharerewabyrêta hÿ. Atakta isoho motsasoko abazubata kytsa iharere bo ma nikaranaha. ⁸Kytsa sizubarêtsa Deus wahoro zubata eze ziknapamykysonahatsa tahanamy ty sibo nyny mykaranaha. Asaktsa hawa eze mohyrikosokdanaha. Merikisedek batu ata hi meky watu my. Deus harere hi:

— Merikisedek ispitu my — niy. Iwaze Abarão tanamy ty tsapukte buruk ibo zibiakak.

⁹⁻¹⁰Merikisedek ske buruk Abarão zihobykze batu itsekokatsaka. Rewi itsekoka ipurukbyize, aibani zuba nipuruk, iwaze itsekokatsa Abarão eze tu niapykyryk. Iwaze Abarão tanamy ty tsapukte buruk ibo zibiakakze Rewi Abarão tsekokatsa tadiri tuk my, iwatahi ata kino niwatihi ibo nyny niy. Ipurukbyita tu tadiri tuk inamy ty Merikisedek bo nyny niy. Atakta

tapara ziknapamykysonahatsa Deus wahoro zubata eze sibo abaktsa kytsa sinamy pibiakaknaha. Ata hi Merikisedek bo inamy ty nyny niy.

¹¹Asaktsa Deus wahoro zubata eze ziknapamykysonahatsa mymyhyrinymyryknaha. Iwatsahi Deus harere bo zuba hỹ tsimykarannahaze mysapyrëtsa tsimoziknaha ana hi sihyriziktsokzawy maha. Rewi tsekokatsa Deus wahoro zubata eze ziknapamykysonahatsa tu batu sipunihik, Deus harere sihumo tsihokdahaŕëna. Iwatahi Deus usta ziwatawy atakta mytsyhyryze ziknapamykysokota niyzik. Kiristu ziwatawy. Atahi Deus wahoro zubata eze ziknapamykysokota niyzikze, batu Rewi tsekokatsa watsa, ata hi Merikisedek wata niyzik. Kiristu zikwy mytuk mynapykyryk iwatsahi Deus harere bo hỹ tsimykarannaha. Ihumo mysapyrëtsa tsimoziknaha.

¹²Rewi tsekokatsa Moises harere humo Deus wahoro zubata eze ziknapamykysonahatsa. Abaka Deus usta ziwatawy, ityryktsa sitsyhyryze ziknapamykysokota niyzik. Abarão hi atakta koikny baktatu Rewi tsekokatsa sisapyzeyky niyzik. Rewi tsekokatsa humo ba mysapyrëtsa tsimoziknaha ba zikyknaha. Kiristu humo zuba mysapyrëtsa tsimoziknaha iwatahi Deus ziwatawy. Abaka Moises harere humo batu myhyrinymyry tsihikik, Kiristu harere bo zuba hỹ tsimykarannaha. ¹³⁻¹⁴Atakta Deus zipehata mybetesatsa mozik batu Rewi tsekokatsa niy. Deus ipe niy:

— Ikia katyryktsa tsyhyryze kawahoro zubata eze tynapamykysokota tsimozik — niy. Atahi batu Rewi tsekokatsa niy. Atakta Suda tsekokatsa niy. Moises batu tyso Suda tsekokatsa soho:

— Ikiahatsa Deus wahoro zubata eze ziknapamykysonahatsa anaeze myraratsa mysiwezona iwa ze myraratsa ty Deus bo nyny tsimykarannaha — iwa Moises batu tyso.

Usta ziknapamykysokota Merikisedek wata.

¹⁵Iwatahi Rewi tsekokatsa Deus wahoro zubata ziknapamykysonahatsa batu ihyriziktsokzaha zikaha. Deus usta zipehata sisapy ziaксе. Sesus Kiristu zipehata Merikisedek wata my. ¹⁶Atahi Deus wahoro zubata eze mynapamykysota niyzik. Kytsa harere humo, batu mynapamykysota niyzik batu sisopykwy humo kino niwatihi mynapamykysota niyzik. Atahi ispitu my, koikny bakta tu iwatahi Deus wahoro zubata eze mynapamykysokota niyzik. ¹⁷Deus harere isoho papeu humo botu ziwataha:

— Ikia kawahoro zubata eze tynapamykysokota.

Kahyrytsa tsyhyryze tynapamykysoko awahi tsysitsumëhĩkĩ h̃y, Merikisedek wata tynakara — niy. Deus harere papeu humo ziwatahaka.

¹⁸Asaktsa Moises harere bo yh̃ nikarannaha batu sipunihik, ana harere humo aparakbaha Deus bo ba ziksioktyhyryk. Iwatahi Deus hi:

— Moises sopyk humo ba tsimyzurukunaha. Kaharere, abaka humo zuba hyýtahaktsa kytsa! — Deus niy. ¹⁹Moises sopykwy humo ba mysapytsa zikyziknaha. Sesus hi Deus bo mymyoktyhyryk ata humo hi Deus okzeka mysapyrêtsa tsimoziknaha, iwatsahi taperykynaha.

²⁰Deus Sesus ziwatawyze iwahoro zubata eze mynapamykysokota mozik. Atahi:

— Pawatawyhik kawahoro zubata eze mynapamykysokota botu iktsaso atsatu mykara. Utakta koikny bakta tu my kaharere botu iktsaso wasani mykara — niy.

Tapara Rewi tsekokatsa nisiwatawyze iwahoro zubata eze ziknapamykysonahatsa niyziknaha ana harere ty batu tyso nisiny zuba niy. Sesus bo zuba ana harere nitsasoko. ²¹Deus harere papeu humo:

— Ikia kawahoro zubata eze tynapamykysokota,
kahyrytsa tsyhyryze awahi tsysitumuêhîkî.

Ahyriziktsokzawy batu zikpykba

awahi tynapamykysokota tsimy — niy.

Deus harere wasani my ba meky watu mytsaty tykara.

²²— Nawa ha ty botu iktsaso atsatu mykara — niy. Iwa Deus Sesus pe zuba niy. Iwatahi iharere abaka wasani mykara. Sesus humo zuba ana harere abaka bazimyi wasani Moises Deus harere nitsasoko ana harere wasani niy. Iharere abaka Sesus pe wasani.

²³Rewi tsekokatsa Deus wahoro zubata eze ziknapamykysonahatsa nikaranaha. Ziknahyrikosokzakanahaze mektsatu ziknaharape sapyzkykynaha. Iwa hÿ. ²⁴Sesus ta mekywa tu my. Koikny bakta tu batu aty tohi zisapyzky. Sesus zuba tawahi mynapamykysokota my. ²⁵Iwatahi izikwy humo mysapyrêtsa tsimoziknaha. Katsa Deus pe tsimykaranahaze:

— O myzo Sesus humo myspirikporêtsa iwatsahi abo tsimypamykysokonaha. Ikia humo ka mykurêtsa — tsimaha. Iwaze Sesus humo mysapyrêtsa tsimoziknaha. Atahi tawahi koikny bakta tu. Deus bo mytsyhyryze mynapamykysoko iwatahi Deus bo mymyoktyhyryk hÿ. Ihumo mymytsumuêhîkî iwatsahi mykurêtsa hÿ.

²⁶Atakta tsimytsumuêhîrêta. Katsa mypunihikbyitsa tu batu sapy tsimaha. Sesus zikwy humo zuba mypunihikrêtsa tsimoziknaha. Atahi tsimysapyrêta hÿ. Batu zimyi. Isapybara bo batu mytsaty ziky. Kytsa asaktsa hawa sisapybyitsa mykaranaha ba mywa ziky my. Ata hi imysapyrênikita bijoikpe bo nido. Deus tuk tasapy anaeze mynapykyryk hÿ.

²⁷Pibyituhukutu tapara ziknapamykysonahatsa Deus wahoro zubata eze myraratsa ty ziknasiwezokonahaze. Asahi:

— O Deus mysapybyitsatu tsikykaranaha ikia myraratsa spu humo tymyokzohik. Atyryktsa sisapybyitsa tu nikaranaha humo kino niwatihi tysiokzohik — nikaranaha. Pororo ziknakaranaha.

Sesusta batu siwatsa my. Estuba zuba Deus bo tanury tynyny niy. Mysapybyitsatu tsikykarana anahumo hi nihyrikosokda, ba zikyrikosokdazo abaka tawahi ispitu my. ²⁸Tapara Moises bo nitsaso. Deus kytsa nisihyrinymyrykyze taparaktsa iwahoro zubata eze ziknapamykysonahatsa nisiny. Asaktsa sipunihikbyitsa tu zimyikinaha. Bykyze zuba Deus tse babata ziwatawy. Bykyze itse babata pe:

— Ikia zuba kawahoro zubata eze tynapamykysokota awahi tynapamykysokota. Kahyrytsa tsyhyryze awahi tysitsumuēhīkīkta. Ikia babata zuba batu zimyi — niy. Deus harere wasani h̄y. Sesus hi mynamybetesawyky my, tawahi mynapamykysokota my taharere tyhi mynakara.

Sesus mytsyhyryze Deus bo mynapamykysokota.

8 ¹Sesus Kiristu zuba tapara Deus wahoro zubata eze mynapamykysokota ana hi tsipahayrinymyry tsihikiknaha. Atahi ipyryrykbyita tsimyharerewabyrēta h̄y. Atahi Deus tuk bijoikpe bo nitsuk, anaeze Deus panuryk taba modyhyky.

²Asaktsa Deus wahoro zubata ziknapamykysonahatsa Deus pokpedawy bo ziknapupukunaha anaeze Deus bo ziknapamykysokota. Ityryktsa tsyhyryze Deus bo ziknapamykysokota. Sesusta meky wa tu my. Deus wahoro zubata ata hi kytsa nizuknikinaha anaeze Sesus batu mopykyryk, atahi Deus hudikhudikwy bo bijoikpe eze mynapykyryk. Anaeze hi isapy mozik, anaeze mytsyhyryze Deus bo mynapamykysokota h̄y.

³Asaktsa Deus wahoro zubata eze ziknapamykysonahatsaktsa tisapyrēna ty Deus bo nyny ziknakaranaha. Deus hi nisiny iwatsahi kytsa tisapyrēna ty Deus bo nyny ziknakaranaha, siraratsa humo kino niwatihi ziknasiwezokonaha. Iwaze siraratsa ty Deus bo nyny ziknakaranaha. Sesus mytsyhyryze mopamykysokota ustsā ziknapamykysokonahatsa watsa Sesus isapyrēnikia ty Deus bo nyny niy. ⁴Atakta mybarawy ezekta batu ziknapamykysokota my. Ustsā Deus wahoro zubata eze ziknapamykysonahatsaktsa asaktsa Moises harere humo zuba yh̄y nikaranaha iwatsahi kytsa tisapyrēna ty Deus bo nyny ziknakaranaha.

⁵Hawa ha ty bijoikpe eze tu wasani my. Wytyk ezeka hyrikoso zuba my. Deus parik Moises nizuknita atakta ihyrikoso zuba my, ihudikhudikwy baba hi bijoikpe eze tu anahi wasani my. Tubabatu Moises hara tykbaba humo tabete niriktohokoze Deus taparik hyrikoso ziwatawy — Nawaty — niy. Deus ipe niy:

— Kaparik ty pykyhytu tyzukni! Kahyrikoso hi abo pawatawy — niy. Ziknapamykysonahatsaktsa kytsa bo nisitsumuēhīkīnaha Sesus bijoikpe eze tu mynamytsumuēhīkī. Atakta mytsumuēhīkītsa.

⁶Deus tatse zipehaze ihyriziktsokzawy tisapyrēna ipe niy. Asaktsa Deus wahoro zubata eze ziknapamykysonahatsa, Rewi tsekokatsa

sihyriziktsokzawy tisapyrēna. Sesus Deus tse mytsapuhyripyrywyta ihyriziktsokzawy tisapyrēna hỹ. Tubabatu Deus Moises bo nitsasokoze iharere humo tisapyrēna. Deus hi:

— Aparakbaha mysisapywyky — niy. Iwaze ziknapamykysokonahatsa humo nawa ha ty nitsaso astsatu nikara, iwa kytsa nisisapywyky. Sesus bo nitsasoze iharere tisapyrēna, iharere mymysapywyky. Sesus humo mymysapywyky hỹ. Katsa anaharere bo hyỹ tsimykarannahaze ana humo hi myspirikporētsa tsimoziknaha. Ihumo kino niwatihi mysapyrētsa tsimoziknaha. Anaharere bo hyỹ tsimykarannahaze Deus tuk mywahi tsimynapykyryknaha iwatsahi mykurētsa tsimoziknaha Sesus humo Deus mymysapywyky hỹ.

⁷Tapara Deus Moises bo nipamykysoko. Anaharere tisapyrēnaha zeka usta harere ty batu tyso. ⁸Moises harere humo myzubaha simysapybyitsa niyziknaha iwaze sisoho Deus harere papeu humo ziwatahaka:

— “Aba usta harere Isareu tyryktsa

Sudeutsa bo motsasoko
abaka kaharere humo sispirikporētsa moziknaha.

⁹Tubabatu taparaktsa ahadiritsa bo iktsasoko.

Esito ekze iksioktyhyryk.


Kaharere sibo iktsasoikik.

Kaharere humo batu hỹ zikaha.

Iwatahi siharere bo kawabybarawa nazukniki” — Deus niy.

¹⁰Deus hi:

— Abaka usta harere Isareu itsekokatsa bo motsaso,
abaka kaharere sibo motsaso.



(Ebereus 8.8)

Kaharere humo simysapyrẽtsa moziknaha.

Kaharere bo mytsatyziu mynakaranaha,
kaharere humo ba zikspiriktsokdanaha.

Kaharere bo hyĩ mykaranaha iwa mozihikiknaha.

Asahi kape sisopyk:

“O atazuba Deus my” maha.

Utakta ispe kasopyk:

“O asaktsa katyryktsa hỹ” — my.

¹¹ Nawatsatu kahumo tsipiknynaha.

Iwatsahi situkytsa bo batu sihyrinomyry.

Situkytsa pe — O Deus tsinynahaktsa! — iwa ba ziktsaso.

Nawatsatu piknynaha iwatsahi isty peha peha byitahaktsa.

Kytsa myhyrizikwanibyitsa, myhyrizikwanitsa, nawatsatu iwa
piknynaha.

¹² Simysapybyitsa tu nikaranaha

ana soho bo batu mytsatyzo my.

Simysapybyitsa tu ziknakaranaha humo myspiriktsokdabaik.

Simysapybyitsa tu nikaranaha mysiokzohik niy.

Iwa Deus harere papeu humo tatyryktsa soho botu ziwataha.

¹³ Tapara kyka mopykba. Ezytyk isapyzesty mozik iwaze ibykyka
tsimoewynaha. Iwa Deus mype niy:

— Kaharere tapara tuky Moises bo iktsasoko ana bo ka mytsaty
mytsaty byitaha! Abaka kaharere bo zuba hyĩ tahaktsa! Iwatsahi
ahamysapyrẽtsa tsmoziknaha — Deus niy.

Kiristu Deus hudikhudikwy bo nitsuk.

9 ¹ Iwatsahi asaktsa Moises harere bo hyĩ nikaranaha Deus bo:
— O ikia zuba tsamysapyrẽta — pororo ziknakaranaha. Iwa Deus
parik eze ziknakaranaha. Ataparik kytsa nizuknikinaha.

² Taparaktsa tahararatsa hwyk ty iparik nizukninaha. Tsapukte buruk
panu ty zipokpedawynaha. Nataba panu ipokpedawy eze:

— Deus imysapyrẽnikita sapy my — niaha. Anaeze rikatsasapy ouro
ty, sidisahawyzozowy kino niwatihi atabete hi atsikara ty Deus bo zozo
ziknakaranaha. Zikzibiyituhukunaha zozozo ziknakaranaha. Iwa hỹ.

³ Iwaze usta taba ipokpedawy eze:

— Atakta imysapyrẽnikita babata sapy my — niaha. Anaka abazubaha
niy.

⁴ Anaeze siraratsa wezowy ouro ty zoknihita. Ana bete iokmorẽnikia
ty Deus bo zikziwezokonaha. Iwaze usta sinamysuk ouro ty zoknihita.
Tsiziurẽta. Anaeze joporosuk tsibik ouro ty zoknihita ty zik niaha. Mana
zinaroko sidisahawy joporosuk eze pokpok niaha anaeze zik niaha. Iwaze
taparakta Arõ zozowy ty bita niaha, tubabatu izozowy humo tasakarebaik.

Tapara ky Deus harere Moises bo nitsaso iwaze Moises iharere harahare humo ziwatahaka. Harahare petok aha humo ziwatahaka ana harahare humo petokuha sinamysuk eze zik niaha. Iwa. Sinamysuk eze zik niaha.

⁵Sinamysuk bete sihyrikosotsa sisapyrētsa. Bijoikpe iknyktsa hyrikosotsa. Sinamysuk tahasara harapu bete niapykyryk. Anaeze ziknampamykysokonahatsitsa simysapybyitsa nikaranaha, kytsa kino niwatihi simysapybyitsa nikaranaha, ana soho hi Deus bo nitsasokonaha:

— O Deus mysapybyitsa tsikykaranaha ana humo hi myraratsa tsiksibakanaha sispu bo iktsa tsimyze ana humo hi tymokzohik — nikaranaha. Iwaze Deus hi:



(Ebereus 9.5)

— Ahamysapybyitsatu tsikykarana ana soho humo hi takyriki ahararatsa ahasapyzky tsiksibakanahaze pahaokzohik — niy. Iwa tisapyrēna hỹ. Abaka ana soho ba pahahyrinymyry.

⁶Iwaze Moises tukytsa ata parik nizuknibanaha iwaze asaktsa ziknapamykysonahatsaktsa ipokpedawy taba ziknapupuikiknaha. Anaeze tsizubarēna nikymynahaze Deus okzeka sihyriziktsokzawy ziknakaranaha.

⁷Usta ipokpedawy tabaka taparaktsa ziknapamykysonahatsa tuk estuba zuba ibo ziknatsukuk. Ba zikzytyhykwa ziktsukuk. Iytyk tsehewywa eze zuba ziknatsukuk. Zinatsukukze myraratsa spu zuba zikorokonaha. Iwaze Deus pe niy:

— O Deus kararatsa kasapyzky ibeze iwatahi kamysapybyita tu ikykara tsikokzo. O Deus myraratsa ahyrytsa sapyzky tsiksibanaha iwatahi simysapybyitsa tu nikaranaha tysiokzohik. Abaka myhumo akryi byihuja — nikara.

⁸Katsa mytsaty tsimykarana haze anapokpedawy eze taparakta ziknapamykysonahatsaktsa tuk estuba zuba zuruze inatsuk, Deus hyrikoso ana soho nimyhyrinymyryky. Hawa kytsa Deus sapy bo ba zikpupunaha Deus hyrikoso nimyhyrinymyry. Iparik atatuze kytsa Deus bo bijoikpe eze ba zikpupunaha.

⁹Ziknapamykysonahatsa Deus wahoro zubata eze tuze, sisapyrēnikitsa ty zuba Deus bo nyny nikaranaha. Siraratsa ty kytsa sapyzkytsa Deus bo nasiwezokonaha. Iwatsatu siraratsa ty nyny nikaranahaze kytsa hi:

— Katsaktsa batu mysapy tsimaha, mysapybyitsa tu tsimykarana — nikaranaha.

Hawa ha ty ziknakaranaha Deus parik eze nimyhyrinymyryky. Aba zuba Kiristu mozumuze iwaze katsa Deus bo tsipomonaha. Ihumo mysapyrētsa tsimoziknaha. ¹⁰Moises harere bo yhỹ nikaranaha. Wastuhu sidisahawy humo batu hauk niaha. Wastuhu siopuwy humo ba zikunaha. Sisopyk tyty tahakpikiknaha iwa ziknakaranaha. Sinury humo zuba siziurētsa niyzikiknaha, simiywynahatsa nikaranaha, iwa ziknakaranaha. Aibani Deus harere abaka nitsasokoze hawa Kiristu humo zuba mysapyrētsa tsimoziknaha ana harere hi taperyky.

¹¹Iwatatu Kiristu izumu. Ata hi ziknapamykysonahatsa Deus wahoro zubata eze nisisapyzky atahi nimitysumuēhikĩ.

— Hawa ha ty isapyrēnikia ty ahabo nyny my — mykara. Deus bo mytsyhyryze mynapamykysoko! Batu iparik eze tu my, ana hi kytsa nizuknikinaha. Atahi bijoikpe bo Deus tuk tasapy Deus baze niapykyryk anaeze Deus bo mytsyhyryze mynapamykysoko, ana hi tisapyrēna.

¹²Deus tuk tasapyze aparabaha hi:

— Atazuba mysapyrēnikia bo nitsuk. Estuba zuba nitsuk. Siraratsa spu ty batu wabehyryk niy. Hozipyrykza spu pikuza spu iwa batu wabehyryk

niy. Sispu ty Deus bo batu tywatawy ziknapamykysonahatsa Deus wahoro zubata siwatsa niy. Mysapyzekenihyrikosokda iwatahi taspu tyty Deus bo zinyny. Ispu humo mysapyrëtsa tsmoziknaha iwatsahi mywahi Deus tuk tsmynapykyryknaha — nikaranaha.

¹³Tapara kytsa simysapybyitsa ziknakaranaha, Moises mypehawyo bo batu hÿ ziknakaranahaze simysapybyitsa ziknakaranaha. Iwatsahi ziknapamykysonahatsa Deus wahoro zubata eze siraratsa spu ty nisinzokonaha. Sisopyk humo hozipyrykza spu, pikuzaspu, pikuzasibikziwezokonaha izohyri ty iwa nisinzokonaha. Iwaze Deus okze wasani niyziknaha.

¹⁴Iwa maha zeka Kiristu spu humo mysapyrëtsa babatsa tsmoziknaha. Ihumo myspirikporëtsa. Kiristu batu ziky tsmysapyrëta zuba. Bazimyi. Deus koikny baktatu ihyrikoso ituk mynapykyryk. Atatu nizihikik Deus bo itanyiny niy, mysapyzekenihyrikosokdaze iwaze Deus bo atatu itanyiny niy. Atahi:

— O kazo ziknapamykysokonahatsa awahoro zubata eze siraratsa nisiwezobanahaze kytsa simysapybyitsa nikaranaha ikia hi:

“O asaktsa wasani maha siraratsa kytsa sapyzekenisibanaha iwatahi wasani maha” tsiktsasoko. Abaka kaspu humo aparakbaha simysapyrëtsa babatsa moziknaha, sisapyzekenihyrikosokda iwatahi ikia ispe:

“O ahamysapyrëtsa babatsa tsmaha katsespu humo tsimy” — Kiristu niy.

Mysapyrëtsa tsmoziknaha iwatsahi mysapybyitsa tsikykaranaha mytsaty mytsaty byijataha. Hawa Deus koikny baktatu itsyhyryze tarabajaziu tsimykaranaha ana humo hi mytsaty tsimykaranaha.

Abaky Deus harere.

¹⁵— Asaktsa Moises harere bo yhÿ nizihikiknaha tsahi tapara iharere bo batu hÿ ziknakaranaha iwatsahi zimyinahatsa tu nikaranaha. Kiristu simysapybyitsa nikaranaha humo nihyrikosokda. Abaka Sesus Kiristu hyrikosokdawy humo Deus simysapybyitsa nikaranaha mysiokzohik. Iwatahi Deus harere abaky mybarawy ezektsa bo niy. Ikiahatsa kawatawyhytsa tsmaha. Katuk ahawahi tsmynapykyknaha, Kiristu mytsapuhyripyrywyta ahasapyzekenihyrikosokda iwatsahi ahamysapyrëtsa babatsa tsmoziknaha — niy. Iwa Deus Kiristu humo mymysapywyky.

¹⁶⁻¹⁷Kyze aty my zeka:

— O uta mohyrikosokdaze kahyrikyky ty abo nyny my — my. Mohyrikosokdaze ihyrikyky ty usta bo nyny my za. Atatuze usta inamy batu ziakse. Ispitu zeka usta namy ba ziakse. Aty tsasoho tihi:

— Atakta nihyrikosokda — niy. Iwaze zuba kytsa piwabynahaze ihyrikyky ty usta piakse. ¹⁸Taparaktsa mydiritsa siakbatsa siraratsa

nisibanaha. Iwaze zuba Moises harere bo yh̄y nikaranaha. ¹⁹Moises Deus harere aparakbaha bo nitsasoko iwaze pikuza tsibik zibeze hozipyrykza kino niwatihi zibeze sispu ty pihik ty tsakykyha niy. Joporosuk bo su niy. Iwaze iparikiha sazik ty isopo inarokoha nizokbatsi panu hozipyrykzazi nitsazikze isopo ity sok niyze izi tsitsairiharēna niyzik ispu humo. Kyze kytsa siharek bete su niy, ipapeu humo kino niwatihi siraratsa spu ty su niy. ²⁰Kytsa bete, ipapeu humo kino niwatihi sispu ty su niyze ata hi:

— Deus harere mybo nitsaso iwatsahi ana harere bo yh̄y tsimahaktsa! Ana spu ahaharek bete su myze iwaze ikiahatsa Deus harere bo yh̄y tsimaha — niy.

²¹Iwata Moises Deus parik bete siraratsa spu ty su niy. Iparik isapyrēnikia ty sibete niwatihi siraratsa spu ty susu nikara. ²²Asaktsa Moises harere bo yh̄y nizihikiknaha siraratsa ty ziknasibaikiknaha. Iwaze kytsa meky watu niyziknaha siraratsa spu humo. Deus anabo hi iktsa niyze bazik takyri kytsa simysapybyitsa nikaranaha sispu humo nisiokzohik. Sinamy kino niwatihi siraratsa spu nisiharasusukuze tisapyrēna niyziknaha. Siraratsa sibaha byizeka batu sispu, iwaze Deus kytsa simysapybyitsa tu nikaranaha batu isty okzohik. Iwa h̄y.

**Sesus Kiristu mysapyzekenihyrikosokda iwatahi Deus
mypsapybyitsa tsimykarana mym yokzohik.**

²³Ziknapamykysonahatsa Deus wahoro zubata eze siraratsa ziknasibaikiknaha, aparakbaha sapyzekenihyrikosokda iwatahi Deus ziknasibakanaha. Asaktsa bijoikpe bo Deus tuk tawahi mynapykyryknaha ispu meky watu maha. Katsaktsa Kiristu spu humo, mysapyrētsa tsmoziknaha, ana humo hi bijoikpe bo mywahi Deus tuk tsmynapykyryknaha. ²⁴Iwatahi Kiristu Deus iparik bo batu paku. Anaeze ky bo kytsa suknihi bo ba ziktuk. Iparik hyritywata bijoikpe eze tu, batu paku. Bijoi kpe bo Deus tuk tasapy. Anaeze hi Deus bo mytsyhyryze mynapamykysoikik iwa mymytsumuēhikī.

²⁵Iytyk tsehewa estuba zuba taparakta ziknapamykysonahatsa Deus wahoro zubata eze imysapyrēnikita babata sapy bo nitsuk. Nitsukze siraratsa spu zebykyrykze. Deus ana bo hi iktsa niyze aparakbaha simysapybyitsa nikaranaha nisiokzohik. Kiristu anabo batu paku atatu Deus bo itany ny mykara. Estuba zuba Deus tuk tasapy iwatahi ibo itany ny niy. ²⁶Ziknapamykysokonahatsa wa horokba ziknakaranahatsa tu nihyrikosokdaikiknaha. Mybarawy nizuknize sinini mynakara batu iwa h̄y. Estuba zuba nihyrikosokda ba zikyrikosokdazo. Mybarawy epykybyze Kiristu wytyk bo inasikze nihyrikosokda iwatahi izumu imysapybara zimoewyba.

²⁷Nawatsatu tsimyhyrikosokdanahaze Deus metutu mym mysapy.
— Ata hi my:

“Asaktsa wasani my. Utsa batu simysapy my” — my. Iwa myhuak ty mybo nyny my, asaktsa Sesus harere bo yh̃y ahabyitsaktsa sinini ykarawy bo mysipehahik. ²⁸Kiristu niwatihi estuba zuba niyirikosokda. Deus bo atatu itanyny niy. Taparakta Deus wahoro zubata eze siraratsa nisiba siwatsa Sesus mysapyzeken niyirikosokda. Iwaze mysapybyitsa tsikykaranaha Deus pahaokzohik. Sesus botu niyirikosokda mybarawy bo myziksizo. Myziksizoze batu mysapybara bo baziky, myziksizoze izikwy humo mysapyrëtsa tsmoziknaha. Abaka atahi mytaperyky h̃y, ihumo mysapyrëtsa tsmoziknaha.

10 ¹Kyze asaktsa Moises harere bo yh̃y nizihikiknahaze Deus harere tsikaeni zuba sihyrinymyry. Deus wahoro zubata eze taparakta tuk ziknapamykysanahatsa siraratsa nisibaikiknaha, iwatsahi pororo ziknakaranaha kytsa sityshyryze nisibakanaha iwatsa tu kytsa batu sispirikpo.

²Simysapyrëtsa niyziknaha zeka batu tahapetu sisopyk:

— O katsaktsa batu myku imysapybara humo tsikykaranahatsa hi mysukatsihikrëtsa tsimykaranaha — nikaranaha. Simysapyrëtsa niyziknaha zeka siraratsa tyka beze beze byitaha. ³Iytyk tsehewa tu siraratsa nisibakanaha pororo ziknakaranaha, tahamysapybyi humo nikaranaha iwatsahi siraratsa nisibanaha. Iwatsatu batu tyso:

— Abaka mysapyrëtsa. Deus okzeka wasani tsimaha mysapybyitsa tsikykaranaha pahaokzohik — nawa batu tyso. Asahi:

— Katsa tsimiyinahatsa. Hawa mysapybyitsa tsimykaranaha — nikaranaha. ⁴Pikuza spu hozipyrykza spu kino niwatihi simysapybyitsa ziknakaranaha anahumo hi batu siokzo.

⁵Iwatahi Kiristu izumu. Ziokpyryze Deus pe niy:

— O kazo mybarawy ezektsa siraratsa mysibanahaze akubyita tsimykara.

Mybarawy ezektsa tisapyrënikia ty abo nyny mahaze akubyita tsimykara.

Kanury tsipikymyze kabo nyny tsimy iwatahi mybarawy ezekta mozik.

⁶Mybarawy ezekta siraratsa mysibaze imysapybyitsa nikara naha humo, akubyita tsmozik.

Aokze siraratsa nikorobanahaze simysapybyri humo akubyita tsmozik.

⁷Iwatahi utakta: “O Kazo mybarawy bo mynasik iwatahi aharene bo zuba hỹy mynakara.

Iwa my. Hawa kasoho botu papeu humo ziwatahaka” — niy.

Iwa Kiristu tazo pe niy.

⁸Tapara iwa niy:

— Mybarawy ezektsa siraratsa ziknasibakanahaze Deus iakubyita ziknakara. Tisapyrënikia ty ibo nyny ziknakaranahaze iakubyita niyzik. Deus okzeka

siraratsa ziknasiwezobaiknahaze iakubyita ziknakara. Kytsa simysapybyitsa nikaranaha humo siraratsa nisibanahaze iwatsahi simysapybyitsa nikaranaha ana humo hi Deus nisiokzohik iwatatu iakubyita nikara — niy.

Iwa Sesus Deus soho niy. Tubabatu Moises taharere humo nisipehahik iwatatu Deus sisopyk humo iakubyita ziknakara. ⁹Iwaze Kiristu hi:

— Uta wytyk bo mynasikze aharere bo zuba hyĩ mynakara iwaze kahumo akurēta tsimozik — niy.

Iwa myze mymywatawy abaka siraratsa wezo humo niwazuba mykara.

— Deus harere bo pykyhytu zuba hyĩ mynakara iharere bo zuba hyĩ mynakara iwaze siraratsa ty ka abaka beze beze byitaha tsimaha. Myzubaha sapyzky mohyrikosokda — niy. Iwatahi Deus mysapybyitsa tsikykaranaha mymyokzohik Kiristu mysapyzky nihyrikosokda.

¹⁰Sesus Kiristu Deus nizihikik naha humo zuba hi hyĩ nikara iwa zikzuruku. Ikahaty zuba nihyrikosokda iwa Deus bo atatu itanyiny niy. Nihyrikosokdaze mysapybyitsa tsikykaranaha Deus ihumo mymyokzohik. Iwatsahi ihumo mysapyrētsa tsimoziknaha, ana hi Deus mybo piwatawy.

¹¹Zikbyituhukutu Deus wahoro zubata eze ziknapamykysokonahatsa siraratsa ziknasiwezoikiknaha. Deus wahoro zubata eze ziknariktoriktohokonaha tahahyrikiziksokzawy humo zuba ziknakaranaha. Siraratsa nasiwezokonahaze kytsa simysapybyitsa nikaranaha batu isty okzohik. Deus siraratsa koro bo iktsa nikaraze kytsa simysapybyitsa nikaranaha ana humo hi batu isty okzo.

¹²Sesus Kiristuta ikahaty zuba nihyrikosokda. Nihyrikosokdaze kytsa simysapybyitsa nikaranaha Deus Sesus humo nisiokzohik. Sesus Deus bo atatu itanyiny niy. Deus baze ipanuryk taba mynadyhyky. Anaeze tawahi mynapykyryk.

¹³Anaeze hi Sesus tasukyrytsitsa mysiperyky, iharere bo yhyĩ mykaranaha, ana hi piperyky. Deus botu ipe niy:

— Uta kazikwy humo asukyrytsitsa aharere bo hyĩ mykaranaha — niy. ¹⁴Ikahaty zuba nihyrikosokda. Katsa mysapybyitsa tsikykaranaha ihumo nimyokzohik iwatahi nihyrikosokda. Ihumo mywahi mysapyrētsa tsimoziknaha.

¹⁵Deus hyrikoso ana ty hi nimyhyrinymyryky. Tapara Deus harere papeu humo ziwatahaka:

¹⁶ — Aibani uta katyryktsa kazikwy humo simysapyrētsa moziknaha.

Abaka sibo motsasoze kaharere bo mytsaty tynakaranaha.

Abaka sakurētsa kaharere bo mytsatyziu mynakaranaha.

Kaharere humo ba zikspiriktsokdanaha — niy.

¹⁷Kyze Deus hyrikoso iwa ziwatahaka.

— Hawa ahamysapybyi tsikykaranaha ana bohi ba mytsaty ziky.

Hawa ahasopyksapybyri tsikykaranaha soho ba mytsaty ziky —

Deus hyrikoso niy.

¹⁸Mysapybyitsa tsikykaranaha Deus taokaniki abaka batu. Iwatsahi mysapybyitsa tsikykaranaha humo siraratsa ba ziksiwezozonaha. Sesus Kiristu nihyrikosokdaze mysapyzekeniyzik iwatahi Deus mymyokzohik mysoho ty batu tywaby. Atahumo hi mysapyrētsa tsimoziknaha.

O kytsa Deus bo tsimahaktsa Sesus Kiristu humo.

¹⁹Iwaze hi:

— O katukytsa mysapyrētsa tsimoziknaha. Mypunihikrētsa tsimoziknaha. Deus bo tsimypamykysokonahaze katsa ipokso batu mypyby tsimaha. Sesus Kiristu mysapyzekeniyrikosokda iwatsahi Deus imysapynikia bo tsimypupunaha. Hawa taparaktsa:

“Atakta imysapyrēnika babata sapy bo” ziknapupukunaha siwatsa Deus bo tsimynapamykysokonaha. Batu ipokso mypyby — tsimaha.

²⁰Taparakta ziknapamykysokonahatsa tuk ana ipokpedawy panu ana bo hi pororo ziknakara iwaze Deus bo ziknapamykysoikik. Katsa Sesus mysapyzekeniyrikosokda naha humo Deus bo tsimypamykysokonaha. Nihyrikosokdaze ipokpedawy panu nisykbaik abaka Sesus humo Deus bo tsimaha. Atakta ispituzo iwatahi, iske ezytyk wa, atakta Deus ske tsimaha. Iwatsahi ibo tsimynapamykysokonaha h̄y.

²¹Sesus mynapamykysokota my. Atahi abazubata my. Deus tyryktsa mysitsumuēhīkī, ata kino mymytsumuēhīkī h̄y. ²²Iwatsahi Deus bo tsimypamykysokonahaktsa! Ihumo tsimyspirikpobabanahaktsa! Ba ahape tu ahasopyk:

— Tozeka ja kasapybyita mykara. Kamysapyrēta ja. Batu kanyhy — iwa batu tyso. Sesus humo mysapyrētsa h̄y. Hawa mymytsyhyrytsapik nahawa iwaze myziurētsa tsimoziknaha, iwatsa katsa ihumo mysapyrētsa tsimoziknaha. ²³Hawa ha ty Deus motsasoko atsatu mykara. Katsa hi:

— Deus mymysapywyky ituk mywahi tsimynapykyryknaha — tsimaha. Batu tyso:

— Deus ja mymysapywy. Tozeka ja ituk mywahi tsimynapykyryknaha. Batu mynyhy — iwa batu tyso.

Deus harere bo zuba tsimykaranaha, iwatsahi iharere humo tsimyspirikpotohinahaktsa kytsa! Iharere tsiperynaha. ²⁴Tyharape pokzitsikinahaktsa! Tyharape tsumuēhīnahaktsa! Hawa Deus humo mysapyrētsa tsimoziknaha iwatsahi ustsakysa tysisapywykynaha! Katsa sihumo mypokzitsirētsa iwatsahi tysisapywykynahaktsa.

²⁵Tynakykpyknahaktsa kytsa! Wastuhu Sesus tuktsa zukbyitsahi tsiwabynaha. Ba siwa zikaha. Tynakykpyknahaktsa iwatsahi Deus harere ty tanymyryky. Tyharape hakusukninahaktsa! Mypehatsa atsoko myziksizo iwatsahi taperyky iwaze tynakykpyknahaktsa!

²⁶Abaka Deus harere wasania ty tsiwabynaha. Ana harere bo hi h̄y tsimykaranaha tsa tu batu ma zikaha, iwaze Deus myhumo taokanizo.

Iwatsahi katsa Deus pokso mypybyrêtsa tsimozikzonaha. Iwaze batu mysapyzo, iwatau Sesus mysapyzemy nihyrikosokda iwatsahi batu myhuakak mysapybyi humo tsimynakaranaha.

²⁷Hawa Deus mykara ana pokso hi mypybyrêtsa. Katsa iharere bo hyÿ aha byizeka sinini tsimynakaranaha. Iwaze Deus mymypehanaha taperyky. Hawa mykpyri piwezonaaha waha sinini tsimynakaranaha. ²⁸Tubabatu asaktsa Moises harere bo batu yhyÿ niahaze utsal kytsa nisibaiknaha. Kytsa petoktsa hawazeka harakykbyihitsa nitsasokonahaze:

— O atakta isapybyitatu nikara, Moises harere bo batu hyÿ niy — nikaranaha. Kytsa atsatu nitsasokonaha zeka iwaze ata maku zibezenaaha. Kytsa ihumo batu simypokzitsiu iwatsahi zibezenaaha.

²⁹Abaka kytsa siwatsa maha, asahi Deus tse humo batu siharezeziu. Deus botu ispe:

— Ahamysapyrêtsa tsimoziknaha. Katse ahasapyzemy nihyrikosokda ahamysapybyitsa tsikykaranaha Sesus humo zahaokzohik iwatsahi ahamysapyrêtsa tsimoziknaha — niy. Asaktsa katse harere bo batu hyÿ niaha. Asahi:

— O Deus atse nihyrikosokda katsaktsa ihumo batu mospirikpo, iharere bo batu hyÿ tsimaha — mykaranaha. Iwa niahaze Deus hyrikoso soho pisapybyikinaha. Ihyrikoso sihumo tsimypokzitsiukrêta my, asaktsa ihumo pisapybyikinaha. Iwatsahi sinini mykaranaha. Kytsa Moises harere bo batu hyÿ nikaranaha sinini nikaranaha. Asa hi Deus hyrikoso zisapybyikinaha sinini mykaranaha hyÿ. ³⁰Hawa Deus tyryktsa tuk mykara iwa myhyrinyrêtsa. Deus harere papeu humo botu ziwatahaka:

— Tubabatu utakta katyryktsa mysitsapusare iky. Abaka batu.

Asaktsa kaharere bo hyÿ mykaranaha zeka, sisukyrytsitsa pokso mysibetesaka.

Asaktsa zisapywykynaha isapyrênikia ty sibo nyny my.

Uta ispe my:

“Ikiahatsa tsisapywykynaha my”.

Usta kaharere bo batu hyÿ mynakaranaha.

Utakta ispe my: “Ikiahatsa batu mysapy tsikykaranaha” my.

Simsapybyitsa tuze sinini ykarawy bo mysipehahik — niy. Iwa Deus harere papeu humo botu ziwatahaka. ³¹Deus koikny baktatu tawahi mynapykyryk. Atakta myhumo takyryki zeka sinini tsimaha. Wasani tsimyzurukunaha zeka ihumo batu mypyby!

³²Hawa tsikykaranaha bo mytsaty tsimaha. Tapara Deus wasania ty tsiwabyahaze ana humo hi hyÿ tsikykaranaha. Deus hyrikoso ahatur niapykyryk. Asaktsa Sesus humo batu sispirikpo pahasininiwykynahaze tsihokdahaarêna hyÿ. Ikiahatsa ahakubyrisorokrêtsa tsikyzyknaha.

³³Usta kytsa Sesus harere bo batu hyÿ mykaranaha pahasapybyikinaha, myzubaha bo pahasapybyikinaha. Iwaze kytsa okzeka sihumo

sinini tsikykaranaha. Kytsa sizubarētsa ana bo hi iksa nikaranaha. Iwaze ikiahatsa kytsa tysitsumuēhīnaha asaktsa sinini mykaranaha tysitsumuēhīkīnaha. Tsimyhyrikosokdanaha zeka batu ahapyby.

³⁴Ahatukytsa Sesus humo sispirikpo ana humo hi sakyriukrēnikitsa hurukwy bo kytsa mysipeha iwatsahi tsiknasisukpararenaha sihumo ahamypokzitsirētsa iwatsahi sibo tsiknakozorenaha. Ahasukyrytsitsa ahanamy ziaksenahaze ahakurētsa tsikyziknaha. Ikiahatsa tihi:

— Deus mymysapywyky isapyrēnikia ty mybo nyny my, bijoikpe eze ituk tsimynapykyryknaha mywahi ituk tsimynapykyryknaha. Ana hi tisapyrēna hỹ. Mynamy aiba tohi zuba myworoba Deus mybo nyny mahaka ana ka batu hawa tohi ziky tawahi mynapykyryk — tsimaha.

³⁵Iwatsahi ahapunihikrētsaktsa kytsa! Ahapunihikrētsa tu zeka Deus tisapyrēnaha ty ahabo nyny my. ³⁶Hawa ha ty Deus mozihihik pykyhytu tahaktsa! Ahakubyrisorokoktsa! Iharere bo hyỹ tsimaha zeka ahapunihikrētsa tsimoziknaha. Iwaze Deus isapyrēnikia ty botu ahabo nitsasoko anatyhi ahabo nyny my. ³⁷Deus harere papeu humo:

— Aibani zuba atakta myziksizo.

Iokboha zuba pykaremyny.

³⁸Kahyrytsa kahumo mospirikpotohinaha

iwatsahi katuk tahawahi mynapykyryknaha.

Kahumo sispirikpo byizeka sihumo batu kaku — Deus niy.

Nawa Deus harere papeu humo ziwatahaka.

³⁹Katsa Deus humo mospirikporētsa. Batu aty tohi mysoho tihi:

— O asaktsa Deus humo batu sispirikpo iwatsahi sinini ykarawy bo mykaranaha — iwa batu aty tohi mysoho ba ziktsaso. Katsa Deus humo mospirikporētsa iwatsahi ituk mywahi tsimynapykyryknaha. Mysapyrētsa tsimoziknaha. Iwa hỹ.

Taparaktsa Deus humo sispirikporētsa nikaranahaze hawa nikaranaha.

11 ¹Kyze Deus harere bo hyỹ tsimykaranaha iwatsahi ihumo mospirikporētsa iwaze hawa ha ty taperyknaha atsatu mybo nyny my. Ihumo mospirikporētsa mypetu mysopyk:

— Hawa ha ty Deus bo tsikzapykykynaha anatyhi mybo nyny my — tsimaha. ²Tubabatu taparaktsa Deus harere bo hyỹ ziknakaranaha ihumo sispirikporētsa. Iwatahi Deus sisoho ziknatsasoko:

— O asaktsa kaokzeka simysapyrētsa — niy.

³Deus harere bo hyỹ tsimykaranaha zeka taharere eze mybarawy nizukni, ana hi myhyrinymyrētsa. Aba ibo iksa tsimykaranaha nizukni. Zinynahabara humo kino nizukni. Taparaka batu tsarawyky iwaze hi tsizubarēna nizukni.

⁴Aba Abeu soho bo mytsaty my, atakta Deus harere bo hyỹ ziknakara ihumo tispirikporēta hỹ. Atahi Deus isapyha ty Deus bo nyny niy. Iziky

kino niwatihi isapyha ty Deus bo nyny niy. Abeu Deus bo nyny niy wasani niy. Atahi Deus humo tspirikporêta hỹ iwatahi Deus ipe niy:

— Ikia kaokzeka wasani tsimy — niy. Iziky bo batu tyso. Atakta Deus humo batu ispirikpo iwatahi isapybara ty ty nikara. Abeu nihyrikosokda. Tubabatu nihyrikosokda iwatahu iharere humo batu myspiriktsokdahu, Deus humo ispirikpota babata niy.

⁵Aba Enoke soho bo mytsaty my, atakta Deus harere bo hỹ ziknakara ihumo tspirikporêta hỹ. Iokzahabyitatu Deus bo nido, Deus zikwy humo hi nido. Itukytsa batu ity nyzo niaha, Deus bo botu nido. Tapara idobyize Deus isoho tihi:

— O ata humo kakurêta — niy. ⁶Katsa Deus harere bo batu hỹ tsimykarana, iharere humo mospirikpo byizeka myhumo batu iaku. Katsa ibo tsimypamykysonahaze mypetu mysopyk:

— O Deus koikny baktatu my, myhumo tsimypokzitsirêtsa mymysapywyky hỹ ana humo hi myhyrinymyrêtsa — tsimaha. Iwaze myhumo tsakurêta my.

⁷Aba Noe soho bo mytsaty my Deus tihi:

— Mybarawy ezektsa pihik humo mysiharazuzukbaik iwaze mysiakbabawyhik — niy. Ana soho ziwaby Noe hỹ niy. Hyritsik batu inyhy iwatahu Deus harere bo yhỹ niy. Tsaraha puêtsikbyita nizukniki iwaze ioke ihyrytsa ahatsa sirehetsa moziknaha. Noe taoke zuba, tahyrytsa tuk Deus harere bo hỹ nikaraze ustsá kytsa iharere bo batu hỹ ziknakaranaha ziwatawyky. Iwatahi Deus hi:

— O ikia kaokzeka wasani tsimy — niy.

⁸Aba Abarão soho bo mytsaty my. Deus ipe nyize:

— Nabo meky botu tsikasapykta! Nabokta! — niy. Hỹ niy. Inyhybyita tu mekybotu Deus harere humo niukuru, iwatahi ihumo tspirikporêta niukuru. ⁹Kyze anabo zumu. Ana soho Deus tihi:

— Naka asapy mozik — niy. Ana bo zumuze isukmota wata niukuru. Batu wahoroko niy. Siraratsa hwyk iparik niy, tatse Isake tuk niapykyryk, itsekoka Sako kino niwatihi iparik eze niapykyryknaha. Deus ispe niwatihi:

— Naka ahasapy mozik — niy. Deus harere bo hỹ nikaranaha ihumo sispirikporêtsa iwatsahi iparik eze niapykyryknaha. ¹⁰Abarão ihudikhudikwy eze ziperyky, anaeze hi Deus mozukni anaeze hi tisapyrêna ana kino ziperyky. Anaka ba zikokda.

¹¹Aba Sara soho bo mytsaty my. Deus ipe niy:

— Tsiktsaikbatatsa tu tsipabykyhy — niy. Deus harere bo hỹ ihumo tspirikporêtatsa iwatsahi tabykyhy. ¹²Ibarikta Abarão nitsaikbata Deus harere humo ioke tabykyhy. Itsekokatsa sizubarêtsa niyziknaha. Hawaze itsekokatsa my. Batu aty tohi ihyrinymyry, byrisoiktsa watsa, batu myhyrinymyry, nimyra hyritywaha niwatihi tsizubarêna hiba, ba ziksiwatawynaha.

¹³Deus humo sispirikporêtsa Abarão, Isake, Sako ahatsa iwa Deus humo sispirikporêtsa babatsa. Deus botu ispe niy:

— Anaka ahasapy mozik — niy. Iwatsahi ana soho hi taperyky. Tahatuktu sisopyk:

— Deus harere humo naka mysapy mozik mykaranaha. Mytsekokatsa naka sisapy mozik iharere humo hÿ — nikaranaha. Iwa Deus harere bo hÿÿ nikaranaha ihumo nispirikpokonaha iwatsahi sakurêtsa niyziknaha. Deus harere nitsasokoze atsatu mykara ana humo hi sihyrinymyrêtsa iwatsahi sakurêtsa moziknaha.

— O katsaktsa mybarawy eze tsimypykyryknaha tuze mysukmotsa tsimaha. Kasapy bo tsipiharamunaha zuba — niaha. Nihyrikosokdanahaze ana humo hi batu sisukmo iwatsa tu Deus harere humo sakurêtsa. ¹⁴Asaktsa motsasoikiknaha:

— O kahudikhudikwy tsipiharamunaha zuba — mykaranaha usa hudikhudikwy taberiki. ¹⁵Tahasapy ekze inaonaha tsa hi batu mytsaty zikaha. Tahasapy bo mytsaty mykaranaha zeka iwaze zikzisionaha. Batu ihokdaha. ¹⁶Asaktsa usa hudikhudikwy taberiki, ana bo hi mytsaty nikaranaha. Anahudikhudikwy bijoikpe bo tisapyrêna. Deus hi anahudikhudikwy sibo nyny my. Deus sihumo batu sikpyby. Ipe nikaranahaze:

— Katsaktsa Deus hyrytsa tsimaha, ihumo myspirikporêtsa — nikaranaha. Deus ana harere bo yhÿ niy.

¹⁷⁻¹⁸Aba Abarão soho bo puêtsik mytsaty my. Abarão tatse ty Deus bo nyny niy. Deus botu ipe niy:

— Atse mopurukze ihumo atsekokatsa sizubarêtsa maha — niy. Yhÿ nikara iwatahi ana harere humo hi itse nipuruk. Kyze Deus Abarão niyze hawa kahumo iakparawy babata pinymyry tsihikikze, iwatahi atakta kaharere bo ma my zeka pinymyry tsihikik. Iwaze Deus ipe niy:

— Atse ikahatahi tsibezehikta! — niy. Iwa niyze — Atakta kahumo tsimypokzitsiarêta babata — mytsaty nikara. Iwaha humo Abarão ihumo iakparawy pihyrinymyryky. Deus ipe niyze:

— Atse ikahatahi tsibezekta, Abarão iharere bo hÿÿ niy. ¹⁹Tatse asiba zibeze tatuktu isopyk:

“O Deus katse Isake mynahyryzikpowy” — niy. Abarão Deus harere bo hÿÿ niy ihumo tispirikporêta babata my, ana bo Deus nikoze ipe niy:

— Niwazubakta! — niy. Iwaze Abarão tatse tawahoro bo zisihyrykzo. Atahi inahyryzikpo tawata niy. Iwa Abarão tatse Deus bo nyny niy, hawa ihumo tispirikporêta babata ziwatawy.

²⁰Aba Isake soho bo mytsaty my. Atakta Deus harere bo hÿÿ nikara ihumo tispirikporêta iwaze tahyrytsa pe:

— Deus pahasapywyky, bykyzehu isapyrênikia ty ahabo nyny my — niy. Iwa ihyrytsa Sako Esau ahatsa bo nikara.

²¹Aba Sako soho bo mytsaty my. Atakta Deus humo tispirikporêta zumuzakaze Deus pe niy:

— O ikia zuba amysapyrênikita ahumo kakurêta hỹ — niy. Nitsaikbata tu tazowoy humo tatyhuziwy niy. Sako tatsekokatsa pe:

— O Deus isapyrênikia ty ahabo nyny my — niy. Iwa Sose hyrytsa pe niy.

²²Aba Sose soho bo mytsaty my. Atakta Deus harere bo hyỹ nikara ihumo tispirikporêta nikara zumuzakaze tatukytsa pe:

— Isareu tsekokatsa Esito ekze tsinaonahaze, kapoiktsa tyszozikyknaha nabo kahudikhudikwy bo tu tysiutyknaha — niy.

²³Aba Moiseszo soho bo mytsaty my. Asaktsa Deus harere bo hyỹ ziknakaranaha ihumo sispirikporêtsa iwatsahi tahatse ziokpitsihiknaha. Esito ezektsa pehakatsa tihi:

— Sudeutsa makuskyrytsa mopuruknahaze tysibanaha! — niy. Iwatatu Moises zo ihumo batu pyby. Itse tsiziurêta iwatsahi byzoje harakykbyihi zirahaze tabykyhy ziokpitsinaha.

²⁴Aba Moises soho bo mytsaty my. Atakta Deus harere bo hyỹ ziknakara ihumo tispirikporêta. Esito ezektsa ipe sisopyk:

— Abazubata ste tatse tu tsimy — nikaranaha. Taypykze ana harere batu iakparawy. Deus harere bo hyỹ nikaraze itukytsa bo iakparawy.

²⁵Situk sinini ziknakara. Imysapybara tu batu hỹ nikara, batu tabo zuba ziknakara. Deus bo zuba ziknakara iwatahi tatukytsa tuk sinini ziknakara. ²⁶Batu tapetu isopyk:

— O Esito eze tu mynapykyryk zeka kanamy tsizubarêna hỹ my — iwa batu tyso. Deus tyryktsa nisitsumuêhĩ tsihikik hỹ. Iwatahi tatukytsa harere bo batu hỹ nikaranahaze Kiristu wata nyzik. Kytsa iharere bo kino niwatihi batu hỹ nikaranaha, Deus tyryktsa nisitsumuêhĩkĩ zeka tsakurêta hỹ niy. Inamy tsizubarêna humo tsikaeni zuba iakparawy. Iwatahi Deus ziperyky:

— O atahi isapyrênikia ty kabo nyny my — ana humo kino tsihyrynymyrêta niy.

²⁷Deus harere bo hyỹ nikara ihumo tispirikporêta tu Esito ekze niparak. Ispehatsa kyriwy humo batu ipyby. Deus harere bo zuba hyỹ nikara ihumo tispirikporêta tsakurêta. Deus bo mytsaty ziknakara nawa zikzuruku iwatatu Deus bo batu iktsa niy, isoho humo mytsaty ziknakara. ²⁸Moises Deus harere humo hyỹ nikara ihumo tispirikporêta iwaze Isareu tsekokatsa pe:

— Bijoikpe iknykta Esito ezektsa hyrytsa taparaktsa mysiba. Iwatsahi hozipyrykzatsa spu ty ahahokbowytsa bo susu taha. Iwaze bijoikpe iknyktsa iharapu taba my ahahyrytsa taparaktsa batu mysiba ahahyrytsa mysiharamu zuba. Hozipyrykzatsa spu bo iktsa niyze ahahyrytsa ba ziksiba — niy.

Kyze hawa Deus sihumo tsimypokzitsiukrêta mytsaty ziknakaranaha tahamyikaha bo pororo ziknakaranaha Paskoa inarokoha bo. ²⁹Isareu tsekokatsa kino niwatihi Deus harere bo hỹ ziknakaranaha ihumo sispirikporêtsa. Iwatsahi buburu zuba zitsikzanaha, siekze pihik nitsehespyk. Buburu zuba Pihik Tsikyiriri inarokoha niy. Bykyze Esito ezektsa atsatu koikny zitsikzakanahatsa tu pihik nisiharapusu. Batu aty tohi arehabyitsa.

³⁰Aba Isareu tsekokatsa soho bo mytsaty my. Asaktsa Deus harere bo hỹ ziknakaranaha ihumo sispirikporêtsa niaha. Sipehatsa Sosue tuk Deus humo sispirikporêtsa h̃y. Serikoho okpedawy haraharetsa ty iokarawyhyta iwatsahi sisukyrytsitsa ba ziknapupunaha, anahi inakarabaik. Nawa puruze usta tsyhyry humo petok, Serikoho petaba nikarikinahaze atsoko haraharetsa naktsaktsakbaiknaha.

³¹Aba Rahabe soho bo mytsaty my. Atatsa Serikoho ezektatsa niy. Tapara kytsa hapik paikpa ziknaparakatatsa. Aiba eze atatsa Deus harere bo hỹ ziknakara ihumo tispirikporêtsa. Sosue kytsa Serikoho hudikhudikwy bo nisipehaze iwa nizokparakanaha, asahi sodadutsa pokso niwakiknaha. Iwaze atatsa wahoro bo izumunahaze atatsa ispe niy:

— Pakutaha. Ikza pahaokpitsihihik, bykyze kytsa pahaberinahaze ba zahapetumunaha — niy. Bykyzehu Serikoho hudikhudikwy ezektsa Deus harere bo batu h̃y zikaha, iwatsahi kytsa nisibanahaze Rahabe batu. Atatsa itukytsa batu isty ba. Atatsa Deus harere bo hỹ nikara ihumo tispirikporêtsa tu nitare.

³²Aba ustsá kytsa Deus harere bo hỹ ziknakaranaha ihumo sispirikporêtsa ahabo batu motsaso, Kideō, Barak, Sasō, Sepata, Dawi, Samue, ustsá Deus sohokotsa iwatsa sisoho batu motsaso, sisoho piwataha zeka ba zikpyk.

³³Asaktsa Deus harere bo hỹ ziknakaranaha ihumo sispirikporêtsa h̃y. Ustsá tyryktsa bo niwatsorokonahaze sisapy ziaksenaha iwatsahi niwakiknaha. Deus okzeka zisapywykynaha iwatahi isapyrênikia ty sibo nyny niy. Wastuhu kytsa Deus humo sispirikporêtsa iwatsahi ustsá kytsa parinita bo nisihorokiknaha, iwatsatu parinita humo batu siborohuk iwa Deus harere bo hỹ ziknakaranaha ihumo sispirikporêtsa ziwatawykynaha.

³⁴Wastuhu kytsa Deus humo sispirikporêtsa iwatsahi ustsá kytsa izo zuba bo nisioktsokiknaha, iwatsatuze izo humo ba zikarakoronaha iwa Deus harere bo hỹ ziknakaranaha ihumo sispirikporêtsa ziwatawykynaha. Ustsá kytsa asiba nisibanaha sokorotsapuzezetý asaktsa niwakiknaha, Deus sihumo tsimypokzitsiukrêta iwatsahi niwakiknaha. Ustsá kytsa siakubyitsa tu sipunihikrêtsa niyziknaha. Ustsá bipyritsa bo niwatsorokonahaze sipunihikrêtsa niyziknaha. Iwatsahi bipyritsa sipokso

niwakbaiknahaze nanabyitaba nitururukunaha. Iwa ziknakaranaha Deus harere bo hỹ ziknakaranaha ihumo sispirikporëtsa.

³⁵ Aba wytykyryk soho bo mytsaty my. Asiza hi Deus harere bo ziknakaranaha ihumo sispirikporëza iwazahi sihyrytsa botu niakbanahatsa tu Deus nasihyrizikpowy tahajeza bo tu ziksizonaha.

Usiza sakyriukrënikitsa nisimyitsapyriwykynahaze sinini nikaranahatsa nihyrikosokdanaha humo. Sakyriukrënikitsa ispe:

— Deus harere bo yhỹ ahabyi zeka ihumo ahaspirikpobyihu ja iwatsahi ba zikamyitsapyrizonaha — niaha. Anahi batu siwabytoktoho. Myhyrikosokdanaha humo batu sipyby. Asiza tihi:

— Batu. Tsimyhyrikosokdanaha zeka, bykyzehu Deus mymyhyrizikpowyzo, iwaze mywahi ituk tsimynapykyryknaha hỹ — iwa mytsaty ziknakaranaha. Iwaze kytsa nisibanaha.

³⁶ Utsa kytsa Deus harere bo hỹ ziknakaranaha ihumo sispirikporëtsa iwatsahi kytsa ziknasiapikiknaha. Nisisapybyikinaha. Nisikikinaha, myraratsa hwyk tsazikihi ty nisikikinaha. Karikutsitsiwyttsa ty nisitsipatsawarakanaha, iwaze sakyriukrënikitsa hurukwy bo nisihuruknaha. Asaktsa Deus harere bo hỹ ziknakaranaha ihumo sispirikporëtsa tu kytsa nisimyijaikiknaha nisisininiwykynaha.

³⁷⁻³⁸ Utsa kytsa Deus harere bo hỹ ziknakaranaha ihumo sispirikporëtsa sisukyrytsitsa haraharetsa nisipaparakanaha iwa nisibakanaha. Utsa kytsa Deus harere bo hỹ ziknakaranaha ihumo sispirikporëtsa sisukyrytsitsa tsapukte buruk bokokik niaha iwa nisibanaha. Sokorotsapuzeze ty nisibakanaha. Utsa kytsa Deus harere bo hỹ ziknakaranaha ihumo sispirikporëtsa tahasukyrytsitsa pokso niwakiknaha batu sisuku. Tahasuk ty myraratsa hwyk ty ziwowokonaha, hozipyrykza hwyk hi kaberto hwyk hi kino niwatihi tahasuk ty niaha. Jerukbara tahasapy niaha. Hara jobonita bo zukzuk niaha batu wahoroko. Harahare hoke bo tahokpitsikinaha, wytyk hoke eze niwatihi tahokpitsikinaha. Batu sidisahawyky taharapa zikzyikikiknaha. Kytsa simyijaikiknahatsa ziknasiapikiknaha. Kytsa sisoho:

— O asaktsa sakmyitsakohok ziknakaranaha. Kytsa okzeka sakmyitsakoho niaha. Deus okzeka simysapyrëtsa hỹ, mybarawy ezektsa batu sapy mykaranaha iwatsahi katyryktsa humo sisikybyrëtsa — Deus niy.

³⁹ Asaktsa Deus harere bo hỹ ziknakaranaha ihumo sispirikporëtsa babatsa. Deus sisoho hi:

— O ikiahatsa tsahamysapyrëtsa tsimaha — niy. Simysapyrëtsa mybarawy eze zikzurukunaha. Deus isapyrënikia ty sibo nyny ahaziwazy niy. Iwatsa tu nihyrikosokdanaha. ⁴⁰ Deus aparakbaha nisisapywytsihikik. Iwatahi ziperyky mybo mytsaty nikara. Abaka asahi iharere bo hỹ mynakaranaha ihumo sispirikporëtsa myzubarëtsa

mymysapywyky. Ihumo mysapyrêtsa tsimoziknaha. Iwatahi katsaktsa Deus zikwy humo mysapyrêtsa tsimoziknaha, ustsá kytsa taparaktsa kino niwatihi ihumo sispirikporêtsa simysapyrêtsa moziknaha. Myzubarêtsa Sesus watsa tsimoziknaha ihumo mysapyrêtsa babatsa tsimoziknaha. Iwa hỹ.

Deus myzo.

12 ¹Kyze asaktsa taparaktsa sizubarêtsa Deus harere bo ziknakaranaha ihumo sispirikporêtsa. Hawa haeze zikzurukunaha tsiwabynaha ana humo hi katsa hi:

— O Sesus harere humo pykyhytutaha hyỹ tahaktsa. Hawa mymysapybyitsa tsikykaranaha tsmoewynahaktsa — tsimaha.

Atakta moparakze tapara pomo tsihikik amy titsakyrikreña zikatsimoewy. Iakubyri mozumu zeka iwatatu ba pyk ziky. Katsa mysapybyitsa tsikykaranaha iwa tsmoewynahaktsa! Nanabyi soho bo ka mytsaty mytsaty byitaha! Katsaktsa tsipimyikinaha iwatsahi Sesus harere humo hyỹ tahaktsa! Tapara zumu tawa tsimoziknaha. Iwaze Deus humo mysipirikporêtsa tsimoziknaha.

²Sesus bo mytsatziutahaktsa! Ihumo Deus harere bo hyỹ tynakaranahaktsa! Atahi Deus humo tispirikporêta hỹ. Deus harere bo hyỹ ziknakara. Iwata tsimoziknahaktsa! Atakta nihyrikosokdaze tatuktu isopyk:

— Bykyzehu kazo tuk kakurêta mozik. Asaktsa zikmyijakanaha iwatatu sisapyzoky iharapatawyhyta humo myhyrikosokda. Kytsa hi:

“O kytsa iharapatawyhyta humo mohyrikosokda zeka sisikpybyrêtsa maha.” Siwa ba mytsaty ziky batu kasikpyby. Deus harere bo hyỹ ikykara iwatahi ituk kawahi mopykyrykze kakurêta hỹ ana soho bo mytsaty mynakara. Iwaze tsihokdaharêna Deus humo kamypokzitsiarêta iwatatu mohyrikosokda — niy. Abaka Deus panuryk taba modyhyky. Deus tuk ityryktsa mysipeha.

³Hawa Sesus sinini ziknakara naha bo mytsaty tahaktsa! Sakyriukanikitsa ihumo batu siakparawy. Asaktsa Deus harere bo batu hỹ zikaha sispirikpobyitsa tu iwatsahi ziaknikinaha. Atahi tsipunihikrêta hỹ. Iwata bo hi mytsatytahaktsa! Iwaze iwata ahapunihikrêtsa tsimoziknaha. Ihumo tsimysipirikpotohinaha.

⁴Simysapybyitsa mymypeha tsihikiknaha. Deus wasania ty sibo tsiktsasonahaze ana humo hi zahamyijakanaha. Asahi pahabanahatsa ziwazy. Sesus wata batu sinini tsimykaranaha. ⁵Deus harere bo mytsatziutahaktsa! Iharere papeu humo botu ziwatahaka iwa niy. Deus tahyrytsa humo nawa isopyk iwatahi botu ziwatahaka:

— Kahyrytsa pahasininiwyky zeka tsiwabytoktonahaktsa!
Ikiahatsa sinini tsimykaranaha ana humo hi tsinymyrykynaha.

Utakta pahapehahikze tubyizuba taha!

⁶ Mypehatsa myhumo tsimypokzitsiukrêta iwatahi mymysininiwyky iwaze mysapyrêtsa tsimoziknaha.

Kahyrytsa spirikpowy bete mysipehako iwaze

wasani mykaranaha iwa kaharere bo piwabytoktokonaha — niy.

Iwa Deus harere papeu humo niy. Ana humo hi ahaspiriktsokda byihuja!

⁷ Iwaze sinini tsimykarannahaze ahakubyrisoroktsaktsa! Sinini tsimahaze ahatuktu tsimaha:

— O myzo bijoikpe eze tu mysapyrêtsa tsimoziknaha iwahi mozihihik, iwatahi pahasininiwyky — tsimaha. Katsa myhyrytsa pimiyinahaze mytahaarahanaha, Deus mykara nawatihi.

⁸ Aty itse isopyksapybyita tuze ipe ahabyizeka:

— Atakta isopyksapybyita atsebyitatu my — tsimaha. Deus kino niwatihi tahyrytsa mysipehaka iwatsahi simysapyrêtsa moziknaha. Ispedahuk byizeka batu ihyrytsa babatsa zikyziknaha. ⁹ Mypykbyize myzotsa harere bo yhÿ tsikykaranaha. Ziknamypehakanahaze siharere bo yhÿ ziknakaranaha. Asahi kytsa zuba iwatsa tu siharere bo yhÿ tsikykaranaha. Deus hi bijoikpe eze tuze ihyrikoso my, ata harere humo pykyhytu hyÿ tahaktsa! Iwatahi ata mymypehaze iharere humo atsoko hyÿ tsimykaranaha, iwa ituk mywahi tsimynapykyryknaha.

¹⁰ Myzotsa ziknamypehakanahaze mysapyrêtsa tsikyziknaha. Sisopyk humo wasani tsikaha, ana hi nizihikiknaha. Deusta tsihyrynymyrêta iwatahi iharere wasani nikara, iwa mysapyrêtsa babatsa tsimoziknaha ana humo hi mozihihik, Sesus wa tsimoziknaha ana hi mozihihik. ¹¹ Deus mymypehaze mysukatsihikrêtsa tsimoziknaha. Sinini tsimykarannahaze batu myku. Bykyzehu mykurêtsa tsimozikzonaha. Mydikrêtsa Deus harere humo hyÿ tsimykaranaha, iwatsahi mysapyrêtsa tsimoziknaha hÿ. Mysapyrêtsa tu Deus harere humo hyÿ tsimykaranaha iwatsahi mykurêtsa hÿ.

Deus harere bo zuba hyÿ tsimykaranaha.

¹² Iwatsahi ahabo ka mytsaty mytsaty byitahaktsa! Sisukatsihikrêtsa tsysitsumuêhînahaktsa! Asahi tsikaeni zuba Deus harere humo hyÿ mynakaranaha. Iwaze ahamo sispirikporêtsa moziknaha. ¹³ Wasani haty zuba ikiahatsa mytsatziutahaktsa! Iwatsahi sisopyksapybyitsa tu simysapyrêtsa moziknaha.

¹⁴ Ahaõtutsa pauksitsa bo tysisapywykynahatsa kytsa! Harape tybetsak betsak byitaha! Mysapyrêtsa babatsa tsimoziknaha. Mymysapybyitsa tu tsimykaranaha zeka mypehatsa Sesus ba zynynaha. ¹⁵ Deus myhumo tsimypokzitsiukrêta, myzibytuhukutu myhumo tsimypokzitsiukrêta iwatsahi tyharape tsumuêhînahaktsa kytsa! Deus harere humo hyÿ tsimykaranaha iwa tyharape tsumuêhîkînaha. Wiharata iskpita wata

anahi imyrawywy wata ahabyitaha. Wiharata myrawy batu sapy my. Aty Deus harere bo batu hỹ ahabyi zeka itukytsa kino niwatihi Deus harere bo batu hỹ zikaha. Atakta batu imysapy my. Wiharata iskpita wata. Iwatsahi pykyhytutaha kytsa! Ahatukytsa tysitsumuẽhĩkĩknahaktsa! Iwaze kytsa ahaharere humo ba zikmyinaha.

¹⁶Asahi mekta oke tu pipyrirykyze tysitsumuẽhĩnahaktsa! Kytsa Deus harere bo zuba hyỹ mykaranaha tyharape pokzitsinahaktsa! Esau wata ba zikaha. Atahi Deus harere bo batu hỹ nikara. Atahi taparakta taypykta myhyrizikwani. Tabo zuba mytsaty ziknakara. Tsaraparẽta niyze tatsy pe niy:

— O katsy adisahawy ty kabo nynytykta. Uta tapara ikypykta hi myzo mohyrikosokdaze ihyrikyky kanamy mozik! Abaka adisahawy ty kabo nyny tsimy zeka ikia taypykta wata tsimozik, myzo mohyrikosokdaze ihyrikyky anamy mozik. Ikia kasapyzeken tsimozik iwatahi Deus pasapywyky. Iwa tsimyzeka adisahawy huak zuba — niy. Deus harere humo batu hỹ niy, iwatahi tadisahawy bo zuba mytsaty nikara. Iwabyitaha. ¹⁷Aibani zuba Esau myhyrizikwanita niyzik tsihikik. Izo itsyhyryze Deus bo nipamykyso tsihikik ba hawa tohi zikaha. Itse iykpykbita tsyhyryze botu Deus bo nipamykyso. Iwa hỹ. Tapara taypykta tisukatsihikrẽta nikara. Nipuziuku. Deus pisapywyky ana hi nizihikik. Hawa niy ahahyrinymyrẽtsa iwatsahi iwata byitaha!

¹⁸Kyze taparaktsa myzotsa hara jobonikita bo zumukunaha hara inarokoha Sinija. Zumunahaze izo zuba. Bijoikpe satata nioktsirõõ miwa niyzik. Zopoktsa inabybyknaha. Ana pokso sipybyrẽtsa. Ana kino nimypybytykynaha. ¹⁹Sibekeresuka hyritywa ziwabynaha. Deus yksoho ziwabynahaze sipybyrẽtsa nikaranaha:

— O niwazubaktsa! katsa mypybyrẽtsa — niaha. ²⁰Moises tihi:

— Hara jobonita bo ka zukzuk byitaha! Myraratsa harasukpetara bo ka dodo byitaha. Estuba harasukpetara mydo zeka tsibezekta! Haraharetsa tsysipaparanahaktsa iwatahi tsibezena — niy. Ana harere pokso sipybyrẽtsa. ²¹Moises niwatihi tsipybyrẽta. Hara bete niapykykze nanabyi bo nikozokoze ana pokso hi tsipybyrẽta:

— Nanabyi bo ikozoze ana pokso mytydydykyktu. Kapybyrẽta mykara — niy.

²²Niwazuba! Ikiahatsa batu siwatsa tsimaha. Deus harere tsipiwabynahaze ahapybybyihu ja. Ikiahatsa usta hara bo jobonikita bo tsikzumunaha. Ata hara Siaõ inarokoha, anaeze hi Serusarẽhe hudikhudikwy my. Deus koikny baktatu isapy bo tsikzumunaha. Isapy Serusarẽhe inarokoha bijoikpe eze kino niwatihi. Anabo hi tsikzumunaha. Anaeze Deus tsumuẽhĩtsitsa mynapykyknaha, bijoikpezektsa sizubarẽtsa mynapykyryknaha. Deus humo sakurẽtsa nikaranaha.

²³Kiristu Deus zipehata ityryktsa bo tsikzumunaha. Siwatsa ityryktsa tsimaha niwatihi. Sizubarêtsa Deus tyryktsa maha. Tapara taypykta tawata myhyrizikwanitsa moziknaha. Deus papeu humo sinaro ziwatahaka ana papeu bijoikpe eze tu my iwatsahi sakurêtsa hÿ. Ikiahatsa Deus bo tsikzumunaha. Atakta kytsa huak ty sizubarêna ty nyny my. Asaktsa mybarawy ezeaktsa wasani ziknakaranaha, iwatahi isapyrênikia ty sibo nyny my, tahawahi Deus tuk mynapykyryknaha. Utsa mybarawy ezeaktsa simysapybyitsa tu ziknakaranaha Deus sinini ykarawy bo mysipeha. Ikiahatsa sihyrizikararawytsa bo tsikzumunaha. Asahi Deus humo simysapyrêtsa niyziknaha.

²⁴Sesus mytsapuhyripyrywyta bo tsikzumunaha. Ata humo hi mysapyrêtsa tsimoziknaha. Abaka Deus harere mybo nitsasoko. Nihyrikosokda iwatsahi ispu humo mysapyrêtsa tsimoziknaha. Hawa taparaktsa siraratsa spu Deus bo wabehyryk ziknakaranaha, katsaktsa Sesus spu humo mysapyrêtsa tsimoziknaha ispu tisapyrêna hÿ. Kaï tatsy zibezehek iwatsahi ispu humo mytsaty tsimykarannahaze. Katsa Deus pe tsimaha:

— O Deus ikia Abeu spu tsipitsapusare tsimaha. Sesus mysapyzekenihyrikosokda iwatsahi ispu bo mytsaty tsimykarannahaze, Deus pe tsimaha:

“O Deus mysapybyitsatu tsikykarannaha iwatahi Sesus spu humo tsimymyokzo” tsimaha.

²⁵Iwatsahi Deus harere bo wabyziutahaktsa! Tubabatu Deus hara Sinija inarokoha bo niy. Moises Deus harere taparaktsa bo nisihyrinymyrykik. Batu hÿ — niaha. Iwatsahi sinini ziknakaranaha, sihuak ty Deus sibo nyny niy. Batu siaku. Abaka Deus bijoikpe ikny mymyhyrinymyryky. Iharere bo yhÿ ahabyi zeka sinini tsimykarannaha hÿ. ²⁶Sinija jobonita bo izumuze kytsa bo nitsaso, nitsasokoze mybarawy nitydydykyk tu. Abaka mytuk mopamykysokozo atahi:

— Mybarawy pitydydywyzo. Mybarawy pitydydywyzoze. Bijoikpe kino niwatihi pitydydywyzo — niy. ²⁷Deus hi:

— Estuba zuba mybarawy pitydydykyzo — niy. Iwatahi mybarawy nizukni hana bo ja meky watu mozikzo. Mybarawy bijoikpe kino niwatihi izikwy humo ezytyk mozikzo. Itydydykokbara zuba motare.

²⁸Deus hudikhudikwy ba zihokza, anaka itydydykokbara. Deus myzubaha bo abazubata mozik ba hawa tohi zikzukninaha. Anaeze ituk tsinapykyryknaha. Iwatsahi Deus bo tsimysakibazikiknahaktsa kytsa!

— O Deus ikia zuba apunihikrênikita. Ikia zuba amysapyrênikita ahumo ka mykurêtsa hÿ. Abaka mywahi atuk tsimynapykyryknaha ana humo hi mykurêtsa — tsimaha.

O kytsa iharere humo pykyhytu wabyziutahaktsa! Hawa ha ty mozihihik naha ty zuba tsimahaktsa! Atahi abazubata ihumo mpybyrêtsa

iwatsahi iharere bo zuba hỹ tsimykaranaha. ²⁹Deus harere bo hỹ tsimykaranaha ihumo myspirikporẽtsa. Izo mokorobaik nahawa. Deus izo waha, asaktsa iharere bo yhỹ ahabyizeka nasipykwy izo waha hỹ.

Hawa tsimyzurukunaha Deus myhumo tsakurẽta.

13 ¹Kyze ikiahatsa Sesus tuktsa tyharape pokzitsikinahaktsa! ²Sisukmotsa ahawahoro bo mozumunaha zeka ikiahatsa hi: — Mywahoro bo paku paku tynaha ahawanu ty haĩ haĩ taha — tsimaha. Sihumo ahamypokzitsirẽtsa tsimaha. Tubabatu wastuhu kytsa sisukmotsa pe:

— Paku paku taha — niaha. Sisukmotsa zubatsa ja nikaranaha asahi bijoikpe iknyktsa Deus tsumuẽhĩtsa niaha.

³Asaktsa sakyriukrẽnikitsa hurukwy eze niapykyryknaha sibo mytsatyziu tsimykaranaha! Sibaze tu watsa sibo mytsaty tahaktsa! Tysisapywykynahaktsa. Kytsa sinini mykarannahaze sibo mytsatyziutahaktsa! Ahape tu tsimykaranaha:

— Tozeka ja katsa kino niwatihi sinini tsimykaranaha — tsimaha. Iwatsahi tysisapywykynaha.

⁴Ikiahatsa hi tsikaha:

— O katsa tsimymysukzanahaze wasani tsimaha — tsikaha. Wasani hiba. Aty ustatsa pihuahua tsihikikze batu isopyksapy my. Amatatsa ustatsa barikta pihuahua tsihikikze batu isopyksapy my. Iwa tsimyzurukunaha zeka Deus pahamyitsapyriwyky.

⁵Ahaokryrsaro soho bo ka mytsaty mytsaty byitahaktsa! Ahanamy humo ahakurẽtsa ana kino tsikaeni zuba tuzihikiknaha! Deus hi ahape my:

— Utakta ahapok baze tu mynapykyryk, ikiahatsa kakparawy iwatahi ba zahaerek — my. Iharere humo ahakurẽtsa hỹ. Deus ahasoho humo ba zikspiriktsokda. ⁶Iwatsahi ahapunihihrẽtsa tsimoziknaha. Utsaktsa sipybyrẽtsa pe:

— Mypehakatsa mymytsumuẽhĩkĩ.

Kytsa pokso batu mypyby.

Hawa kytsa mybo mykaranaha ana pokso batu mypyby.

Deus hi myhumo tsimypokzitsiukrẽta mynakara — tsimaha.

⁷Ahapehatsa soho bo mytsaty tahaktsa! Tubabatu Deus taharere ty zahahyrinmyrykynaha. Hawa zikzurukunahaze ahaspiriktsokdabyihu ja. Hawa wasani ziknakaranaha. Nihyrikosokdanahaze Deus humo sispirikporẽtsa hỹ. Siwa tahaktsa kytsa! Ikiahatsa kino Deus humo tyspirikpotohinaha.

⁸Sesus Kiristu kino atahi my. Hawa tapara ziknakara aba kino niwatihi mynakara. Aiba eze kino niwatihi astatu mynakara. Koikny baktatu mykara hỹ.

⁹Utsa kytsa siharere pahahyrinymyrykynaha zeka siharere meky watu maha. Deus harere humo batu zahahyrinymyry. Mydisahawy soho humo pahahyrinymyrykynaha. Pahaspihikbatakanaha. Siraratsani tsimymydisahakanaha zeka wasani my. Siraratsani ty hauk ahabyizeka wasani my. Deus harere humo zuba mysapyrëtsa tsmoziknaha atahi mymysapywyky hỹ.

¹⁰⁻¹¹Tubabatu Deus wahoro zubata eze taparaktsa ziknapamykysonahatsa iwa ziknakaranaha. Siraratsa nisibaiknaha mysopyksapybyitsa tsikykaranaha humo nisibaiknaha. Deus siraratsa spu bo iktsa niyze iwatahi nisiokzohik. Iwaze siraratsa spu Deus imysapyrënikia bo zibykyryk.

— Taparakta ziknapamykysokota imysapyrënikia bo nitsuk — niaha. Anaeze Deus siraratsa spu bo iktsa niyze taokaniki iwatahu kytsa sisopyksapybyitsa nikaranaha humo nisiokzohik. Kytsa siraratsa nurytsa nokponi ziknasiskiknaha. Sihudikhudikwy bara botu nasiskiknaha. Anaeze nisiwezokonaha. Batu sizoho ziboronaha.

Siraratsa wata Sesus nihyrikosokda. Mysapyzeken nihyrikosokda iwatsahi ihumo mysapyrëtsa tsmoziknaha. Hawa siraratsa nurytsa sihudikhudikwy bara botu ziknasiskiknaha, iwaze Sesus nihyrikosokdaze, kytsa sihudikhudikwy bara botu zibezenaha. Deus ispu bo iktsa niyze iwatahi mysapybyitsa tsikykaranaha nimyokzohik.

¹²Sihudikhudikwy bara botu nihyrikosokda. Kytsa sispirikpobyitsa tu nizukyryknaha. Anaeze iharapatawyhyta humo zihyrikiziknaha. Iwaze mysapyzeken nihyrikosokda. ¹³Iwatsahi Sesus wata tsimahaktsa! Mysapyzeken nihyrikosokda. Iwatsahi hawa Sesus mozihikikze tsimaha. Kytsa myharere bo yhỹ ahabyizeka wasani my. Mymymyijakanaha zeka wasani my. Iwatahaktsa!

¹⁴Katsaktsa mybarawy eze tu tsimyzurukunaha, mysapy eze tu tsimynapykyrykspyknaha hawa eze tamiwy. Usa hudikhudikwy taberi. Bijoikpe myhudikhudikwy baba mozik. Ana hi mysapy mozik. Anaeze Deus tuk tsimynapykyryknaha. ¹⁵Iwatsahi Deus bo tsimisakibaziknahaktsa! Katsa hi:

— O Deus myzo Sesus humo ikia bo tsimypamykysokonaha. Ikia zuba amysapyrënikita. Ikia zuba abazubata. Ikia humo ka mykurëtsa tsmoziknaha — tsimykaranaha. Ana hi Deus piwabyze tsakurëta mozik. Tubabatu kytsa siraratsa ty Deus bo nyny ziknakaranaha. Abaka myraratsa ty ba nynyzo zikaha. Abaka myharere ty ibo tsimytsasokonaha. Iwatahi myharere humo tsakurëta mozik.

¹⁶Sinamybyikitsa tsysitsumuëhĩnahaktsa! Asaktsa batu sidisahawyky ahadisahawy ty sibo nynyta. Kytsa bo tsysipywykynahaktsa! Ahaspiriktsokda byihuja. Iwatahi Deus ahahumo tsakurëta mozik.

¹⁷Ahapehatsa harere bo ma tynakaranahaktsa! Siharere humo pykyhytutaha hyỹ tsimykaranaha. Ahahyrikararawytsa humo

simypokzitsiukrêtsa. Deus bo hawa pahapokzitsikinaha zeka motsasokonaha. Myzaharapokzitsikinaha iwaze ahamysapyrêtsa tsimoziknaha. Iwatsahi pahatsumuêhî tsihikiknaha. Siharere bo ma tsimykaranaha zeka sakurêtsa maha. Siharere bo yhÿ ahabyi zeka sisukatsihikrêtsa maha. Iwa zeka ba zatsumuêhînaha.

¹⁸O kytsa mytsyhyryze Deus bo typamykysokonahaktsa! Deus okzeka wasaniha humo zuba tsimyzihikiknaha. Mypetu mysopyk iwatsahi batu tyso. — Sozeka ja wasani tsizurukunaha. Batu mynyhy — iwatahi batu tyso. Katsaktsa Deus okzeka wasani tsimykaranaha ana humo hi myhyrinymyrêtsa hÿ.

¹⁹O kytsa ahabo myziksi tsihikikzo. Deus bo katsyhyryze typamykysonahaktsa! Ikiahatsa hi:

— O Deus myzo aidytynykta mybo tyziksizo — tsimaha.

Deus bo mopamykysoko.

²⁰Uta Deus bo ahatsyhyryze mopamykyso:

— O Deus ikia humo zuba sakurêtsa moziknaha. Ikia hi mypehatsa Sesus tsikzihyrizikpowy. Abaka sihumo tsimypokzitsiukrêta hozipyrykza perytsa wata atahi hozipyrykzatsa mysiperyky my. Sisapyzeky nihyrikosokda iwatsahi meky watu niyziknaha, ihumo simysapyrêtsa niyziknaha iwatsahi atuk tawahi mynapykyryknaha hÿ. ²¹Myzo aharere bo zuba hyÿ tynakaranaha, ana humo kino tysitsumuêhî! Hawa tsimyzihikik ana humo kino tyszizikwykyrykta. Ahumo sipunihikrêtsa moziknaha. Hawa tsipyreña humo tysitsumuêhîkî. Asahi:

“Sesus Kiristu ikia amysapyrênikita. Ikia zuba tsahyryzikporêta” iwa tawahi mykaranaha ana hi myzo bo myzapykyky — my.

Iwa Deus bo ahatsyhyryze mopamykysoko.

Abaka pepykbaka.

²²Kyze katukytsa kaharere tsiwabytoktonahaktsa! Utakta pahakusukniki iwatsahi ikiahatsa Sesus tuktsa babatsa tsimoziknaha ana humo hi papeu humo ahabo piwatahaka. Kahumo ja ahakubyrisorokok kawatahaha pykyhytu tspinymyrynaha. Kapapeu humo jokboha zuba iwatahaka.

²³Mytsy Timoteo soho tawaby tsihikik. Sakyriukrênikitsa hurukwy ekze zoihik. Iwatahi piperyky. Mozumu zeka ituk ahabo tsimynakozorenaha.

²⁴Katsaktsa ahapehatsa bo, Sesus tuktsa sizubarêtsa pe:

— O mytukytsa ahahumo myhyrizikbarêtsa — tsimaha. Sesus tuktsa Itaria ezektsa kino niwatihi ahahumo sihyrizikbarêtsa.

Deus pahasapywyky.

²⁵Ahatsyhyryze Deus bo mopamykysoko. — O myzo tysisapywyky sihumo amypokzitsiukokta! — my. Niwazuba.